

NSONI SAMU NA DYAMBU YA NDIINGA



Matondo na nge, Mpangi Neville. [Mpangi Neville me tuba, “Amen.”—Mu.]

Mu vwanda tuba na Mpangi Neville, “Kieleka ti nge kele ve na mwa ndambu ya kupakulama na suka yayi?”

² Mu me kwiza samu na kusambila samu na bambevo. Ya vwandaka na mwa bantu yina vukanaka na yina beto. . . Lumingu na suka-suka. Bayina mu zolaka kuzwa kuna, mu me lomba bawu na kwiza awa na yinzo-Nzambi. Mpe mu—mu ke banzaka ntangu nyonso ti ya kele mbote na kusambila samu na bambevo na yinzo-Nzambi. Mu zaba ve. Mu ke zolaka yinzo-Nzambi, mpe kukwiza awa kisika dibuundu, kisika yayi awa bantu ke sambilaka.

³ Mpe ya vwandaka na mwa mwana mosi ya kento na manima kuna, mwa mwana ya kento ya kitoko mingi, mbote, mu banza ti yandi kele ya kuvwanda kisika mosi awa ntangu yayi, kana ba kwendaka ve na yinzo. Oh, mu me mona ntangu yayi. Mpe ya kele kima mosi ya kitoko mingi. Mpe yandi kele kieleka ya kubela. Mpe beto vwanda kuwa, ntangu beto kuwaka nsangu ya kuzonza bandinga mpe bantendulu yina kupesamaka. Mpe beto kuwaka, mpe beto vwandaka banza ti beto kuwaka ti kima kutubamaka na yina me tala mwa mwana ya kento. Mpe beto vwanda vingila na kumona kana Mfumu ke pesa nsangu, yina ya kutuba kuna. Kasi mu banza ti mwa mwana yango ya kento kele mbote ntangu yayi, mpe yandi ke vwanda mbote. Mpe na yawu. . .

⁴ Mpe ya vwandaka dyaka, na mama mosi yina vwandaka mona dyaka ve, mpe beto vwandaka sambila samu na yandi. Mpe bakala mosi na ambulance na ngaanda kuna, mulongi. Mu banza ve ti bakala yango lendaka kuzwa kitezo ya bakilo kumi na tanu, to makumi zole. Kaka—kaka kieleka, kieleka. . . Mpe na yawu mu kwisika samu na kusambila samu na bawu.

⁵ Mpe ya kele samu na yina mu vwandaka na mwa maketi-keti, mingi, ya kele ti kisengo mosi ya dinu ya munu vwandaka me katuka. Mpe mu vwanda bula mwita munu mosi, na suka yayi, na kisika yango ya dinu ya munu kuna, na mantwala kuna. Mpe ba tubaka na munu na kuyidika yawu, mpe ti ba tula na zulu ya yawu bayimpu. Mpe na yawu kinunu yayi ke na kumataka kaka na malembe, ya kele kima kaka yina mu zaba. Mpe mu vwandaka na kisengo na yawu yayi, mpe mutindu na ndambu ya dinu, mpe ntangu mu ke banda na kuzonza, beno lenda kuwa yawu, mutindu mupepe ke luta, beno—beno zaba yinki mu zola

kutuba, ke luta na bikoba. Mpe ya ke sala beno kuzonza, mutindu kima kele na ludima.

⁶ Beto kele tsyelika bantu ya kyese na kuvwanda ya moyo na suka yayi, mpe na kuvwanda na balenda ya kukwiza na dibuundu. Mpe na kilumbu yayi yina ke na ntwala ya Nowele, na kuingilaka nkinzi yina ba ke kuzwa, yina, mu—mu banza mu. . . Ya kele na bana mingi awa na suka yayi, na yawu mu ke vwandaka kaka swi. Beno me mona? Mpe beto bakuluntu, bantangu yankaka, beto ke zonzaka bima yina bana zolaka kuwa kwandi ve, beno zaba.

⁷ Kasi, mu banza ti dibuundu ke na mwa dikabu awa samu na bana ya fyoti, na manima ya mwa ntangu fyoti. Mu vwanda tala kaka yawu, na manima kuna. Oh, beno ke zola kuvwanda. Na manima ya lukolo ya Lumingu, beno vingila kaka, beno me mona, samu ti mu—mu banza ti ba ke na mwa makabu na manima kuna samu na bana ya fyoti, ya kukabula na suka yayi. Mpe ntangu mu. . . Beno bana ya fyoti, beno bambuka moyo, na ntangu beto ke sala yayi, mu zola kukumisa yayi pwelele, ya kele Tata ya Nowele ve, samu ti ya kele disolo yina kilumbu mosi beno ke longuka ti ya kele na kima mosi ve na yawu. Kasi ya kele na Yesu Klisto, Kieleka ya makieleka nyonso, beno me mona, Mwana ya Nzambi. Mpe beto ke na kupesa beno mwa dikabu yayi, na suka yayi, samu ti ya ke bika beno kuzaba ti kilumbu mosi Nzambi pesaka dikabu ya kulutila nene yina muntu kuzwaka ntete: Mwana ya Yandi. Mpe beto ke na mutindu ya mawa, na kutuba yawu. Mpe ya kele ve na kima beto lenda pesa na kufwanikisa na yawu. Kasi kaka mutindu bantu ke kufwa, mosi na mosi, beto ke salaka yawu.

⁸ Ntangu yayi, mu zolaka vingila tii Lumingu ke kwiza. Mpe mu kukondwa ntembe ke sala, na mutindu nyonso, na zulu ya kima yina mu zolaka kutuba. Mpe kima me—me monana na beto, kuna na yinzo, na vision, ti mu fwana kusala yawu. Mpe ya kele mutindu ya. . . Ya kele mutindu ya, na kumona, ke vwanda mutindu kima ya mpasi, kasi ata mbala mosi ve ti beto zola kubanza ti yina Nzambi ke tubaka kele mpasi. Bizitu ya Yandi—ya Yandi kele kilo ve.

⁹ Mpe samu ti Lumingu ke na kwiza, kana Nzambi zola, beto ke kuzwa lukutakanu awa yina kaka ntete Kilumbu na ntwala ya Mvula ya Malu-malu, kana ya yangidika Mfumu sala beto ntangu ya mbote ya kuzwa lukutakanu yayi. Mpe beto zola kuzwa lukutakanu ya suka, kusambila samu na bambevo, mpe mu banza kusala lukutakanu ya mbotika. Kuna mu banza, kuzabisa yawu na bankundi ya beto, samu ti bawu kukwiza. Na yina beto ke kuzwa Lumingu na suka mpe Lumingu na nkokila. Mpe na manima bantu yina ke zola kuvwanda samu na Mvula ya Malu-malu, kuna beto fwana. . . Beto ke vwanda Mpimpa ya muvimba, mbala yayi? [Mpangi Neville me tuba, “Yinga.”—Mu.]

¹⁰ Ya ke vwanda na milongi mingi awa, yina ke longi na mpimpa ya Mvula ya Malu-malu, tii mido ya mpimpa. Mpe—mpe beto ke bokila milongi yina na kwiza mpe kuzonza. Kana Mfumu zola, mu zola kuvwanda mosi ya bawu yina ke kuzwa kima ya kutuba na mpimpa ya Mvula ya Malu-malu.

¹¹ Mpe na yina Lumingu ke na kwiza, mu banza ti mu ke sala ndandani ya bima yina ke na kusalamaka, yina me salama, mu ke lakisa mutindu Nzambi ke na kusalaka na bantu ya Yandi, mpe kunata yawu kaka na kisika ya zulu awa na dibuundu.

¹² Mpe mingi ya beno ke na kumiyufula na yina me tala dyambu ya mpaku yayi na yina me vwandaka me lutila. Ya me kubama. Mpe na yawu mu zola kutuba na beno wapi mutindu ya me salama, diaka. Mpe mu banza, ya ke vwanda, samu na kutuba dyaka na zulu ya yawu, Lumingu ke na kwiza, na yawu mu ke vingila kaka tii Lumingu ke kwiza. Mpe kumeka na kuzonzila na beno mwa fyoti, na suka yayi, na Ndinga. Beno me mona? Mpe Lumingu ke na kwiza, mu ke—ke meka na, kana Nzambi zola, na kutuba na beno mutindu nyonso yayi kusalamaka, mpe kunata na beno mosi na mosi ya bima yina Mfumu tubaka, mpe kutala yawu mbote kusalama kaka kieleka na kisika ya yawu. Beno me mona? Yandi ke tubaka ve kima ya luvunu.

¹³ Kasi, ntangu yayi, kima mosi mu zola kutuba na suka yayi, ti mu kukondwa ntembe ke sala ve, ke sala ve Lumingu ke na kwiza, ya kele na zulu ya kima yina me salama mazono. Mu vwandaka na mwa maketi-keti na kwiza na suka yayi, samu ti kieleka mu vwandaka mutindu ya kusikama ve, na yawu mu—mu ke kuwaka mingi ve mutindu yina. Kasi na kuvwandaka awa, mbote, mu ke meka nyonso yina mu lenda.

¹⁴ Nkokila na ntwala ya mazono, mu kuzwaka bampangi, Mpangi ya bakala mpe Mpangi ya kento Sothmann, bayina beto zaba awa, mosi ya ba-administrateur ya dibuundu, mpe kento ya yandi, ba kwizaka kutala kento ya munu mpe munu. Mpe beto vwanda zonzila na balukutakanu yina ke salama na Phoenix mpe bizunga, kana ya kele luzolo ya Mfumu. Mpe beto vwandaka ya kutelama tii pene ya ngunga kumi na ndambu ya mpimpa, mu banza, mpe mu kwendaka na mbeto pene ya ngunga kumi na mosi ya mpimpa.

¹⁵ Mpe ngunga mosi na kati ya mpimpa, mu lotaka ndosi. Mpe na ndosi yayi mu vwanda mona muntu yina zolaka vwanda tata ya munu; muntu ya nene, ya kuvimba, yina vwandaka monikisa kaka, na mutindu ya kutala kuzonza, tata ya munu. Mu monaka kento, yandi vwandaka talana ve mutindu mama ya munu; kasi, dyaka, yandi zolaka vwanda mama ya munu. Mpe bakala yayi (yina zolaka vwanda mutindu tata, bakala ya kento yayi) vwandaka sala yandi yimbi na mutindu ya ngolo, na mutindu ti yandi vwandaka na kitini ya yinti ya nene, mpe yandi vwanda simba yandi mutindu *yayi* mpe vwandaka bula yandi na

kitini ya yinti yayi, mpe yandi vwanda kubwa mpe vwandaka kwenda na yisi. Mpe na manima—mpe na manima, na manima ya mwa ntangu fyoti, yandi vwandaka telama dyaka. Mpe yandi vwandaka belama, yandi vwandaka yilama na bula dyaka yandi, yandi vwandaka bula dyaka yandi. Mpe mu vwandaka ya kutelama ntama, vwandaka tala yawu mbote.

¹⁶ Na nsuka, ya lutilaka munu. Mpe mu vwandaka fyoti mingi kulutila bakala yayi, yina zolaka vwanda mutindu tata ya munu. Na yawu mu kwendaka pene-pene na yandi mpe mu tulaka musapi ya munu na kizizi ya yandi. Mu tubaka, “Kubula yandi dyaka ve.” Beno me mona? Mpe ntangu mu salaka yawu, kima mosi bandaka na kusalama. Maboko ya munu bandaka na kuvimba, mpe mu kumaka nene, na misisa ya nene. Mu me monaka ntefe ve misisa ya mutindu yina. Mpe mu bakaka kaka bakala yango na nkingu, mpe mu tubaka, “Kubula yandi dyaka ve. Kana nge sala, nge ke kuzwa dyambu na munu kana nge bula dyaka yandi.” Mpe bakala yango kumaka na boma, mpe bikaka yandi swi. Mu me vumbuka.

¹⁷ Mbote, na kuvwandaka ya kulala kuna, kaka na mwa ntangu fyoti, kieleka, lutendulu ya yawu me kwiza. Ya vwandaka, na kieleka, kento, na mutindu ya kutala kuzonza, kele Dibuundu, yina kele mutindu mama. Tata kele dénomination na zulu ya yandi, yina ke yala na zulu ya Dibuundu, mutindu bakala na zulu ya kento. Mpe ya kele ba-dénomination yina ke na kubulaka Dibuundu yango, mpe ke bika kwandi ve ti Yandi kutelama na makulu ya Yandi mutindu yina. Kaka, ntangu nyonso yina Yandi ke meka na kutelama to kusala kima mosi, bawu, bantu na kati kuna, dénomination ke bula ke bwisa Yandi. Mpe ya zola kaka kutuba kubasisa mwa—mwa misisa ya lukwikilu awa samu na kulandila na kulakisa musapi ya munu kuna, mpe kutuba, “Nge ke kuzwa dyambu na munu. Beno me mona?” Samu ti, ya kele na mwa bantu na kati kuna yina kele ya Nzambi. Mpe ya vwandaka nyonso ya kulunga. Na . . .

¹⁸ Beto vwandaka ya kutelama pene-pene ya bangunga zole, to tatu, mu banza. Mpe mwana ya munu ya kento, mosi ya bawu, Rebekah, yina kele na manima kuna, yandi ke salaka na Lupitalu ya ba-Méthodiste na Louisville. Ya kele, oh, kulongoka ya ba-infirmière yina ke salaka ve. Ya kele “candy stripers,” ba ke bokilaka bawu, to kima mutindu yina. Mpe yandi vwandaka, yandi . . . Ba bokilaka yandi na kukwenda kuna na suka yango, mpe ya kele yina telemisaka munu. Mpe ya vwandaka na suka-suka, mpe yandi, na mwa mpangi mosi yankaka ya lukolo awa, bawu—bawu ke salaka kuna kintwandi, mpe mu zolaka nata bawu kuna na Louisville. Ba zolaka vwanda kuna na ngunga ya kumi. Mpe kento ya munu vwanda kumiyufula samu na yinki yandi vwandaka lenda ve na kukota na kivinga ya kulala. Mu kangaka yawu.

¹⁹ Ntangu yayi, mu me kuzwa bima mingi kusalama na luzingu ya munu, kasi mu me kuzwaka ntete ve kima mosi mutindu yina. Mu kotaka na vision. Mu zaba ve lutendulu. Mu me kuzwaka ntete ve kima mosi mutindu yina na luzingu ya munu. Kasi, ntete mu, na kutala ti mu bakulaka ti ya vwandaka vision, mpe mu vwandaka na kati ya vision. Kasi mu vwanda zonza na mwana ya munu ya bakala, Joseph. Yina, yandi vwandaka ve na kati ya kivinga na ntangu yina. Kasi na mutindu nyonso, kaka na yina ya vwandaka simba munu, mu vwandaka zonza na Joseph.

²⁰ Mpe mu—mu talaka na zulu. Mpe mutindu na nzutu ya pyramide, ya kutelama na ntwala ya munu, vwandaka na mwa, bandeke ya fyoti, kima mutindu sentimetele mosi ya yinda. Mpe ba vwandaka, na zulu, na zulu ya bintala, ya vwandaka . . . mu lenda tuba, tatu to yiya. Dyaka, na yina vwandaka landa, na kintala yina vwandaka landa ya vwandaka mu banza nana to kumi. Mpe na yisi, ya vwandaka kumi na tanu to makumi zole.

²¹ Mpe ba vwandaka banwani ya fyoti, samu ti mapapu ya bawu vwandaka ya kulemba, mpe ba vwandaka talana mutindu ti ba vwandaka meka na kuzonza na munu, kutuba kima mosi. Mpe mu vwandaka na Wesete, mutindu ti na ziunga ya Tucson, na Arizona. Mpe bandeke vwandaka tala Esete. Mpe mu vwandaka kuwa mbote. Ba vwanda meka na kutuba, ya vwanda talana mutindu ti bawu vwanda meka na kutuba na munu kima mosi. Mpe bawu vwandaka na mapapu ya fyoti, yina vwandaka nyonso ya kulemba, mpe nyonso. Ba vwandaka na bidimbu ya mvita. Kuna, na mbala mosi, ndeke mosi me banda na kubaka kisika ya yankaka, na kudumukaka mutindu *yina*. Mpe bawu, bandeke yango ya fyoti kwendaka na nswalu, na kupumbukaka na esete.

²² Mpe na yina bawu kwendaka, katuka kuna me kwiza bandeke ya nene, ya mingi mutindu bayembe, na mapapu ya bansongi. Mpe—mpe—mpe bawu me kwiza nkonga, mpe na nswalu, na nswalu mingi kulutila bandeke ya fyoti, ba me pumbuka na esete.

²³ Mpe mu vwandaka dyaka na kati ya munu . . . bakonsiansi zole kintwadi, mu vwandaka zaba ti mu vwandaka ya kutelama awa, mpe mu vwandaka zaba ti mu vwandaka kisika yankaka. Beno me mona? Mpe mu banzaka, “Ntangu yayi, yayi kele vision, mpe mu fwana longuka yinki yayi zola kutuba.”

²⁴ Mpe kaka na yina nkonga ya bandeke ya zole me luta, mu me tala na Wesete. Mpe vwandaka talana mutindu na nzutu ya pyramide, mutindu zole na konso lweka, na mosi na zulu, me kwiza Bawanzio tanu ya kulutila ngolo yina mu me monaka ntete ve na luzingu ya munu. Na mutindu ya mbangu ya mutindu yankaka, yina mu me monaka ntete ve. Bayintu ya bawu na manima, mpe mapapu ya Bawu vwandaka na bansongi, vwandaka kwenda kaka na nswalu! Mpe ngolo ya Nzambi ya

Ngolo nyonso kusimbaka munu, na mutindu mosi, tii Yawu nangulaka munu na kukatukaka ntoto, nzila nyonso katuka ntoto, na zulu.

Mu vwanda kuwa Joseph kuzonza dyaka.

²⁵ Mpe ya wakanaka mutindu makelele ya kibaka me pasuka, ti—ti makelele ya nene mingi me kwenda, nzila na kitamina, na Sude. Mpe ntangu ba nangulaka munu. . . Mpe ya vwandaka na mbangu mosi ya mutindu yankaka ya Bawanzio! Mpe mu—mu lenda kaka kumona Bawu ntangu yayi kaka, beno me mona, na yina—na yina Bawu vwandaka kwiza, na nzutu yina mutindu *yina*, vwanda kulumuka kaka na munu.

²⁶ Ntangu yayi, mu vwanda lota ve, ntangu yayi. Ve. Mu vwandaka kaka kuna, tsyelika ya kuvumbuka mutindu mu kele ntangu yayi. Beno me mona?

²⁷ Kasi awa Yawu me kwiza. Mpe Bawu vwandaka kieleka na mbangu na mutindu yankaka, tii mu banzaka, ntangu Yawu nangukaka. . . Mu kuwaka kupasuka yina, mutindu, to mutindu kupasuka yina wakanaka, mutindu makelele ya kibaka. Mpe ntangu ya salaka, mu banzaka, “Mbote, yayi fwana zola kutuba ti mu ke kufwa ntama mingi ve, beno me mona, na mutindu mosi ya kupasuka.” Mpe—mpe mu kaka. . . Na yina mu vwandaka banza na bima yango, mu banzaka, “Ve, ya lendaka vwanda ve yawu. Samu ti, kana ya vwandaka kupasuka, ya zolaka kuzwa Joseph, mpe. Samu ti, kuna yandi kele, ke na kuzonzaka dyaka, na kubanzaka ti mu kele kuna. Mu lenda kuwa yandi. Ya vwandaka yawu ve.”

²⁸ Ntangu yayi, yayi kele nyonso dyaka na kati ya vision. Ya vwandaka ve. . . Beno me mona? Ya vwandaka na kati ya vision.

²⁹ Mpe kuna, na mbala mosi, na yina mu bakulaka ti ba kuzwaka munu. . . Ba vwandaka ziunga ya munu. Mu vwanda lenda ve kumona Bawu, kasi ba nataka munu na kati ya kuvukana ya bambwetete yayi ya pyramide ya Bawu, na kati ya kuvukana ya bambwetete yayi ya—ya Bawanzio, yina vwandaka tanu. Mpe mu banzaka, “Ntangu yayi, Wanzio ya lufwa zolaka vwanda kaka mosi. Tanu ke vwanda lemvo.” Mu vwandaka banza yina. Mu banzaka, “Oh! Yawu ke—Yawu ke na kwiza na Nsangu ya munu. Ya kele kisika ya munu ya zole ya zulu. Ba ke na kwiza samu na kunatila munu Nsangu ya Mfumu.” Mpe mu me boka na ngolo nyonso, na ngolo nyonso mutindu mu lendaka, “O Yesu, yinki Nge zola munu kusala?” Mpe na yina mu salaka, Yawu me katukila kaka—kaka munu.

³⁰ Kubanda kuna, mu—mu—mu ke na kuwaka mbote ve. Beno me mona? Mu vwandaka, kilumbu nyonso ya mazono, mu zolaka vwanda na yinzo, mu vwanda banza na kuwaka mbote ve. Mu vwanda lenda ve na kusungika dibanza ya munu. Mpe nkembo mpe ngolo ya Mfumu! Mu vwandaka nyonso ya kulemba, ntangu Yawu katukilaka munu. Mu vwanda meka na kunika maboko ya

munu. Mpe mu banzaka, “Mu ke na lendaka ve na na kupema.” Mpe mu vwandaka tambula bisika nyonso, mpe na yisi, mpe na manima mpe na ntwala. Mu vwandaka banza, “Yinki ya zola kutuba, Mfumu? Yinki ya zola kutuba?” Na manima, mu me telama. Mu tubaka, “Mfumu Nzambi, kisadi ya Nge kele. . . Mu—mu ke na kubakula kaka ve. Samu na yinki? Ya vwandaka yinki? Zabisa yawu, Mfumu.” Mbote, ntangu. . .

³¹ Mu lenda tubila beno ve, ntangu mu tubaka, “Ngolo ya Mfumu.” Ya kele ve na mutindu ya kubangula yawu. Ya kele ve yina beno ke talaka awa, na kati ya balusakumunu. Yina kele balusakumunu ya Mfumu. Yayi kele ya santu! Oh, la la! Ya kele—ya kele na zulu ya nyonso yina muntu ke kufwa lendaka banza kwandi. Beno me mona? Mpe ya—mpe ya vwandaka kwamisa munu, na mutindu ya yimbi mingi. Ya kele ve. . . Ya kele ve lusakumunu. Ya kele kukwamisa. Beno ke vwanda na mabanza ya kidi-kidi. Beno me mona? Ya kele yina. Kana beno lenda kaka. . .

³² Kana mu lendaka kuzwa mutindu mosi yina mu lendaka tuba na bantu yinki ya vwandaka, to yinki ya. . . yina vwandaka mutindu ya yawu ya kuwa! Ya, ya kele ve mutindu kuvwanda awa, kuvwanda na nsatu ya kukembila. Ya kele—ya kele kima yina konso musisa na kati ya beno kaka. . . Ya kele na zulu ya boma. Ya kele na zulu ya boma ya kulutila. Ya kele buzitu ya santu. Ya. . . Mu. . . Ya kele ve na mutindu ya kubangula yawu. Mpe, tii, manima ya munu nyonso, na zulu mpe na yisi ya mukongo ya munu, tii na misapi ya munu, na zulu mpe na yisi na makulu mpe na misapi ya dikulu ya munu, nzutu ya munu nyonso vwandaka kaka ya kulemba, beno me mona, kaka mutindu beno me—beno me basika na yinza, kisika mosi. Mpe—mpe ya vwandaka bika munu, na kukwendaka malembe-malembe, mpe mu tubaka na—na Mfumu, “Nge zola kaka kuzabisa munu, O Nzambi?”

³³ Mu banza, ti, ngolo ya yawu ya kulutila dyaka yina kwizaka na munu, ya vwandaka ntangu mu vwandaka na Zurich, na Suisse, ntangu yina ntangu Yandi lakisaka munu Ngononi ya Allemagne yina vwandaka tala mbote munati mpunda ya Angleterre yina vwandaka sabuka Afrika. Mpe Yandi tubaka, “Bawu nyonso me sumuka mpe me kondwa nkembo.”

³⁴ Mpe mu vwandaka dila na Mfumu, na kusadisa munu. Mpe mu—mu zola Yandi kupesa munu ntendulu, samu ti mu vwanda kumiyufula kana ya zolaka tuba—kana ya zolaka tuba ti mu zolaka kwenda, ti ba zolaka kufwa munu. Mpe kana ya vwandaka, mu zolaka tuba kima ve na dibuta na zulu ya yina. Kana ya kele ntangu ya munu na kwenda na Yinzo, mbote, mu ke kwenda kaka na Yinzo, kaka yina. Kasi kana—kana ya kele yina ya zola kutuba, mu zola ve kutuba na dibuta, mu zola bawu ve kuzaba kima na zulu ya yawu. Bika kaka yawu kusalama, mpe yina—yina ke vwanda nyonso ya yawu.

35 Mu tubaka, “Mfumu, sadisa munu. Mu zola ve kutuba na dibuta, kana—kana Nge. . .Yayi, ya kele lubokilu ya munu na Yinzo, mbote, mu ke—mu ke kwenda.” Beno me mona. Mu tubaka. . .Mpe, beno zaba, beno kele. . .

36 Beno ke tuba, “Mbote, samu na yinki nge banzaka ve na yina nge tubaka na kati ya vision, yinki vision tubaka?”

37 Kasi beno lenda ve kubanza na bima mutindu yina kuna. Beno. . .Mu lenda ve, na mutindu nyonso. Mpe mu banzaka. . . Mu vwandaka kaka na kidi-kidi, ya kumaka kisaka-saka. Beno zaba ve mutindu ya kubanza. Beno lenda ve kubanza.

38 Mpe mu tubaka, “Tata ya Mazulu, kana yina zola kutuba ti—ti kupasuka zolaka baka munu, mbote, ti mu zaba ntangu yayi, kuna mu ke tuba kima ve na zulu ya yawu. Ti nkembo ya Nge mpe ngolo kukwiza na zulu ya munu dyaka, mpe nangula munu dyaka. To, ti nkembo ya Nge kukwiza na zulu ya munu, mpe kuna mu ke—mu ke zaba kuna ti ya zola kutuba—ya zola kutuba ti, mpe kuna mu lenda bumba yawu samu na munu mosi.” Mpe kima ve kusalamaka.

39 Na yawu kuna mu tubaka, “Na yina, Mfumu, kana ya zola kutuba ti Nge ke fidisa Minati nsangu ya Nge samu na kisalu ya munu, kuna ti ngolo ya Nge kukwiza dyaka.” Ya zolaka basisa munu na ngaanda ya kivinga!

40 Kuna, mu—mu me vutuka na munu mosi, na Biblia ya munu na diboko ya munu, kuna, beno me mona, mpe kulomba Nzambi na kusadisa munu. Mpe na yina mu salaka, Yandi—Yandi lakisaka munu kima na Masonuku, yina vwandaka zonza kaka yawu, kaka kuna. Mpe mu banzaka, “Yina tsyelika lendaka vwanda yawu? Wapi mutindu mu salaka yawu?” Mpe, oh, mu—mu lenda ve kutendula bima yayi, bankundi. Ya kele na zulu ya kima nyonso yina mu zaba. Beno me mona?

41 Kento ya munu kele kieleka kento ya mutindu yankaka; mosi ya kulutila mbote na kati ya yinza. Kasi, na manima ya mwa ntangu fyoti, mu tubaka ve kima na zulu ya yawu. Mu kwendaka na ntwala. Yandi zabaka ti kima kusalamaka. Na yawu ntangu mu tubaka na yandi, yandi tubaka, “Nge zaba, Bill, mu ke monaka nge mpe mu ke kuwaka nge, na mingi ya bima yango.” Yandi tubaka, “Nge zaba ti mu ke kwikila nge na ntima ya munu nyonso,” yandi tubaka. Yandi tubaka, “Kasi yina kieleka vwandaka na kima mosi.”

42 Yawu kukondwa kaka ntembe, kuningisaka kaka munu, kupasuka yina mpe na nswalu yina vwandaka kwiza Bawanzio yango mutindu yina, tanu ya bawu kintwadi, na kuvukana ya bambwetete ya bawu. Mutindu, mutindu—mutindu mu fikulaka pyramide yango awa, beno me mona, ba vwandaka talana, na ntete, Bawu vwandaka talana mutindu, mutindu ya. . .na ntama, bawu vwandaka talana mutindu tinta ya bayembe. Mpe bawu vwandaka kwiza na—na lweka *yayi*. Mpe bawu vwandaka,

na kutala mutindu, mosi, zole; tatu, yiya; mpe dyaka mosi na zulu kaka, beno me mona, ya vwandaka sala tanu. Mpe bawu vwandaka kwiza na mbangu mingi! Ya kele ve na kima, ata avion ya réaction, ata kima yankaka lendaka fwanakana na yawu.

⁴³ Mpe mu lenda kaka kumona bawu, mpe bayintu ya bawu mutindu ya kubaluka fyoti na lweka. Mapapu yango ya kutala na manima, ya kufuluka na ngolo, mpe awa bawu ke na kwiza, na yina “Fiou!” Mutindu yina. Me kwiza kaka na yisi, mpe me baka kaka munu na kati ya pyramide ya constellation ya bawu. Mu me kumimona ya kunanguka, ya kunanguka na zulu ya ntoto. Mu vwandaka banza ti ya lenda vwanda. . . Mu kuwaka, ntama kuna, makelele yango, “Whoom!” Mutindu mpepo ntangu yawu ke sabukaka kibaka ya makelele, beno me kuwaka yawu kusalama mutindu yina, kaka mutindu makelele ntama.

⁴⁴ Mu banzaka, “Yayi lendaka zola kutuba ntangu yayi, ntangu awa vision yayi ke katukila munu, ti mu ke kufwa na kupasuka to na kima mosi.” Mu banzaka, “Munu yandi yayi. Mu kele ya kunanguka. Mu kele. . . bawu, bawu kele awa kisika mosi, mu kele—mu kele na kati ya yayi, pyramide yayi ya Bawanzio awa. Kasi, mu—mu zaba ve. Ya lenda vwanda ti Mfumu ke na kwiza na kubaka munu na Yinzo.”

Na yina mu kuwaka Joseph na yisi kuna, kutuba, “Papa?”

Mu banzaka, “Ve, kana ya kele yawu, ya zolaka baka yandi, mpe.”

⁴⁵ Kuna Kima mosi tubaka, “Nge. . .” Beno bambuka moyo, mu ke na kuingilaka, ke na kutalaka mbote na Nsangu yina mu ntangu nyonso ke na kuingila, kima mosi.

⁴⁶ Mpe vision, kilumbu yankaka yina, beno zaba, mutindu mu kuzwaka awa ntama mingi ve, yina vwandaka tuba na munu na yina zolaka salama; mutindu mu vwandaka longa, katuka mwini, na kati ya kisika yayi. Mpe—mpe kuna Yandi tubaka, “Ntangu yayi beno bambuka moyo, kisika ya zulu ya zole kele dyaka na kwiza.”

Mu banzaka, “Ya ke vwanda na Nsangu.”

⁴⁷ Beno ke bambuka moyo na Nsangu ya munu awa? Yinwa ya ditadi ya nsongi, kisika, bandinga sambwadi yango mpe bidimbu yina kusonamaka mpe ve na kati ya Ndinga ya Nzambi. Beno me bambuka moyo? Mpe ya bakaka munu na kati ya pyramide yango.

⁴⁸ Mpe Junie Jackson, kana nge kele awa, ndosi yina nge pesaka munu ntama mingi ve. Mu ke tuba yawu ve na suka yayi. Nge vwandaka kieleka. . . Nzambi vwandaka kieleka ya kulunga. Mpe lemvokila munu na kupesaka nge ve ntendulu; samu ti, mu monaka kima kukota na kisalu.

J. T., kima mutindu mosi, beno me mona. Mpe mu—mu—mu zabaka yawu.

Mpe Mpangi ya kento Collins, mutindu kaka mosi. Beno me mona?

Mpe sambanu ya bawu, ke na kupesa kaka kima mutindu mosi.

⁴⁹ Mpe kuna vision yina mu tubaka na beno nyonso, bamvula me luta, ya me salama kaka kilumbu yankaka yina. Beno me mona? Ya ke salama.

⁵⁰ Mpe kuna ya kele, ke na kutandamaka kaka, nyonso ke na kutandamaka kaka kuna. Ya kele kaka kima ke na kati ya kisalu. Mu zaba ve yinki ya kele. Nzambi sadisa munu; ya kele kisambu ya munu.

Beto sambila.

⁵¹ Tata ya Mazulu, beto kele—beto kele kaka bantu ke kufwa, mpe awa beto me telama na suka yayi. Mpe, Mfumu, mu . . . Nge me fidisa munu na kutwadisa mwa mameme yayi mpe dibuundu yayi. Mpe mu me kuma na nsuka ya munu. Mu zaba ve wapi nzila, yinki, wapi kisika, ke na kwiza. Kasi mu zaba kima mosi yayi, ti, Nge tubaka ti Nge ke sala “nyonso kutambula kintwadi samu na bumbote ya bayina” zola Nge mpe bayina me bokilama landila lukanu ya Nge. Mu ke sambila Nge, Nzambi, ti diboko ya Nge ya nene ya kyadi kuvwanda na zulu ya beto.

⁵² Beto zaba tsyelika ti Nge kele Nzambi. Mpe beto zaba ti Nge kele ve mosi yina zingaka na bilumbu yina lutaka, kasi Nge ke dyaka moyo bubu yayi. Nge ntangu nyonso vwandaka Nzambi. Nge ntangu nyonso ke vwanda Nzambi. Nge vwandaka Nzambi ntete ntangu, mpe Nge ke vwanda Nzambi ntangu ya kele dyaka ve na ntangu. Nge ke vwanda kaka Nzambi.

⁵³ Mpe beto kele na maboko ya Nge, Mfumu. Beto kele kaka ntoto, mpe Nge kele Mubongisi, Muwumbi banzungu. Yidika baluzingu ya beto, Mfumu, na mutindu ti ya ke pesa kisalu ya mbote ya kuzitisa Nge. Pesa yawu, Tata. Beto kele kaka na maboko ya Nge.

⁵⁴ Beto vwandaka ve na mutindu ya kunata beto mosi awa, to beto zaba ve mutindu beto ke kwenda. Mfumu, Nge me pesa beto luzingu, mpe Nge ke . . . Beto me vutula baluzingu ya beto na Nge, mpe, na yawu, Nge me pesa beto, yina beto me futa samu na kuzwa, Luzingu ya Kukonda nsuka. Lukwikilu ya beto vwanda ke zinga na kati-kati ya moyo ya beto. Mpe beto zola Nge samu na yayi, samu ti beto zaba ti kilumbu mosi beto ke mona Nge, mpe Nge ke vwanda na kati ya nkembo ya Nge. Mpe beto ke tala na Yandi. Mpe beto zola kuwa mambu yango, “Ya vwandaka ya kusala mbote, kisadi ya Munu ya mbote mpe ya kukwikama. Kota na kati ya bakyese ya Mfumu, yina ba kubikaka samu na nge kubanda mbandukulu ya yinza.” Tii kilumbu yina, O Nzambi, ntangu beto nyonso ke kutana, twadisa beto.

Beto kele bisadi ya Nge, mpe beto ke lombale mvo ya masumu ya beto.

⁵⁵ Ba-visions ya nene yayi, Mfumu, ya kele ya kulutula mingi samu na kisadi ya Nge. Mu zaba ve yinki ya kusala. Mu—mu zaba kaka ti ba kwizaka. Mpe mu lenda tuba kaka yina mu me mona, mpe yina ya tubaka. Mpe bantangu yankaka ya ke salaka munu boma, Mfumu. Mpe mu—mu ke kumiyufula yinki ya kusala.

⁵⁶ Mpe mu ke baka Biblia mpe ke tanga na kati kuna mutindu Ésaie zolaka tala kilumbu yina na tempelo, ntangu yandi monaka Bawanzio yango, mapapu ya kufuka makulu ya Bawu. Kukondwa ntembe yandi bokaka, “Kyadi na munu! samu ti meso ya munu me mona nkembo ya Mfumu.”

⁵⁷ Mpe ya vwandaka kuna profete bokaka: na manima ya kuvwanda ya kuvedisa na kati ya tempelo, ntangu Wanzio bakaka ba-pense ya kisengo mpe dikala ya Tiya mpe tulaka yawu na zulu ya bikoba ya yandi; na manima yandi me fungula ti yandi vwandaka muntu ya bikoba ya mvindu, mpe ke zinga, na kati-kati ya bantu ya mvindu. Na manima ya nyonso, yandi vwandaka profete. Wanzio bakaka ba-pense ya kisengo mpe tulaka dikala ya Tiya na zulu ya bikoba ya yandi mpe vedisaka yandi, mpe tubaka, “Ntangu yayi kwenda, pesa profesi.”

Mfumu Nzambi, Ésaie bokaka, “Munu yandi yayi, Mfumu. Fidisa munu.”

⁵⁸ Ntangu, Yandi tubaka, “Nani ke kwenda samu na beto?” Na ntwala ya nsungi ya yimbi mpe ya kinsuza!

⁵⁹ O Nzambi, ti ya kuvutukila dyaka. Ti ya kwiza dyaka, O Mfumu. Fidisa Mpeve-Santu na Tiya ke vedisaka. Samu, mu ke fungula ti, mu kele na bikoba ya mvindu, mpe ke zingaka na ntoto yayi awa na bantu ya mvindu. Mpe beto kele mvindu na meso ya Nge, Mfumu. Kasi, oh, fidisa ngolo ya kuvedisa, Mpeve-Santu! Vedisa beto, O Mfumu. Vedisa kisadi ya Nge, Mfumu.

⁶⁰ Mpe kuna zonga, Mfumu. Kisadi ya Nge ke kuwa. Mu zola mingi kuwa Ndira yango. Mu kele ya Nge. Sadila munu, Mfumu, mutindu Nge ke mona na kusala, ntangu mu ke kumitula munu mosi na zulu ya autel ya Nge. Ti Mpeve-Santu kuvedisa munu, Mfumu; mpe kukusa mpe kufidisa, Mfumu, kana Nge zola muntu kukwenda, kana yayi kele ngunga mpe ti yayi kele ntangu.

⁶¹ Mu—mu zaba ve, Mfumu. Mu—mu zaba kaka ti mu monaka Bawanzio yango. Mpe Nge zaba ti bima yango kele kaka Kieleka. Mpe mu ke sambila, Mfumu, “Kyadi na munu,” na yawu sadisa munu.

⁶² Mpe ntangu yayi sakumuna bantu yayi. Mpe beto kele awa bubu yayi, kaka na ntwala ya kilumbu ya mukembo ya mbutukulu ya Mfumu ya beto. Beto ke sambila ti Nge ke sadisa beto.

63 Mpe na suka yayi, kisadi ya Nge, Mpangi ya beto Neville, me tala ti ya lendaka vwanda ntangu yina yandi lendaka pema kaka mwa ntangu fyoti, mpe ti mu lendaka zonza. Mpe mu—mu ke sambila ti Nge ke sadisa munu ntangu yayi.

64 Ya kele na bayina awa, Mfumu, mpe beto nyonso, ke na nsatu ya Nge. Na yawu beto ke sambila ntangu yayi ti Nge ke sakumuna beto na yina beto ke tanga Ndinga ya Nge mpe ke yindula mwa ntangu fyoti. Bika ti Mpeve ya Nge kukwiza na zulu ya beto, Mfumu. Mpe kuvedisa beto mpe kutula beto na Tiya, na Mpeve-Santu, na Nsangu ya Nzambi, ya mubisu yina me katuka na autel, samu na kuingisa yinza yina ke na kufwa, na ntwala ya kukwisa pene-pene ya nene ya Nzambi ya Seko. Samu ti beto me lomba yawu na Nkumbu ya Yesu, Mwana ya Yandi ya luzolo, mpe Mvulusi ya beto. Amen.

65 Ntangu yayi mu zola kubenda dibanza ya beno na mwa Masonuku awa, mpe na mwa banoti, yina mu bakaka.

66 Mpe mu banza ti, Doc, to Billy, to mosi ya bawu tubaka na munu, ti ba zola ti beto basika na mwa ntangu ya mbote, samu na bana ya fyoti. Ba ke na mwa makabu samu na bawu.

67 Beno bana ya fyoti yina me basika kaka na lukolo ya beno ya Lumingo, beno—beno vwanda kaka kisika, kaka ntangu mwa fyoti. Yina beto ke tuba awa lendaka vwanda mwa ya kati mingi samu na beno, kasi beno—kasi beno vwanda kaka swi na mama mpe papa, baminuti fyoti. Mu zola kuzonza na bawu.

68 Ntangu yayi, na Psaumes, Psaumes 89, mu zola kutanga nzila mosi to zole, ya Psaumes 89. Mu ke meka na kutanga 50, 51, mpe 52 ya banzila ya Psaumes 89.

69 Ntangu yayi, beno lenda kuwa nzila nyonso kuna na manima, mbote? Kana beno lenda, beno telemisa maboko ya beno. Na yina mu. . . Yina kele. . . Ba-micro nyonso yayi kele ya kuvukana mosi na yankaka? [Mpangi mosi ya bakala me tuba, “Mu zaba ve.”—Mu.] Yandi *yayi* me lutila mbote, to *yayi? Yayi? Yayi?* [“Bawu zole yayi na lweka kele ya kuvukana.”] Kaka awa, bawu zole *yayi* na lweka? [“*Yayi, yayi, mpe yayi.*”] Mbote mingi.

70 Mu zaba ve kana ba ke baka yawu na bande to ve. Ya kele kaka mutindu ya dyambu ba vwandaka vingila ve na suka yayi.

71 Kasi beno zimbana ve ntangu yayi, beno kuzwa bankundi ya beno nyonso. Mpe mu—mu zola ti, beno sala nyonso yina, beno lenda samu na kuvwanda na lukutakanu ya Lumingo yina ke na kwiza.

72 Na ntangu fyoti ba ke manisa dibuundu awa, mu banza. Mpe mu ke—mu ke vutuka na yina samu na yayi, na kulonga Bidimbu Sambwadi yango, kana ya kele luzolo ya Nzambi, na kutalaka Masonuku awa.

73 Na Buku ya Psaumes, na kapu 89, kubanda na nzila ya 50. Beno kuwa mbote ntangulu ya Ndinga ntangu yayi.

Bambuka moyo, Mfumu, na nsoni ya bisadi ya nge; mutindu mu ke nata na ntulu ya munu nsoni ya bantu nyonso ya nene;

Na yina bambeni ya nge me pesa nsoni, O MFUMU; na yina ba me pesa nsoni na makulu ya yina ya kukusa ya nge.

Lusakumunu kuvwanda na MFUMU ntangu nyonso. Amen, mpe Amen.

74 Mu ke zola kuzonza na beno mwa ntangu fyoti na... Mu zola beno kusimba yayi, ntete, mpe beno tanga yawu mbala na mbala, mbote-mbote. Ya lenda vwanda mbote ti beto tanga dyaka yawu kaka ntangu yayi. Beno kuwa mbote ntangu yayi. Beno me mona?

Bambuka moyo, Mfumu, na nsoni ya bisadi ya nge; mutindu mu ke nata na ntulu ya munu nsoni ya bantu nyonso ya nene;

Na yina bambeni ya nge me pesa nsoni, O MFUMU; na yina ba me pesa nsoni na makulu ya yina ya kukusa ya nge.

Lusakumunu kuvwanda na MFUMU ntangu nyonso. Amen, mpe Amen.

75 Beno longuka Yawu mbote, mutindu David kuzonzaka yawu. Mu zola kubaka mutindu dilongi... Ya kele kieleka mutindu yankaka, mutindu dilongi dyaka ya Nowele; kasi mutindu mu longaka Lumingi me luta na dilongi ya ngitukulu. Mu me zimbana yinki ya vwandaka ntangu yayi. Ya vwandaka... [Mpangi mosi ya bakala me tuba, "Kumwangana Ya Yinza."—Mu.] Pardo? ["Kumwangana Ya Yinza."] Kumwangana: *Kumwangana Ya Yinza.*

76 Ntangu yayi mu zola kubaka mutindu dilongi, Lumingu yayi: *Nsoni Samu Na Dyambu Ya Ndinga.* Ntangu yayi beno bika munu kuvutukila yawu dyaka, mbote-mbote. *Nsoni Samu Na Dyambu Ya Ndinga.*

77 Nzambi kele na ntangu, mpe nsasa samu na ntangu yina, na kulungisa Bandinga ya Yandi nyonso. Nzambi zaba kieleka kaka yina Yandi ke sala. Beto ve. Beto fwana yamba kaka yawu mutindu Yandi me pesa yawu na beto. Kasi, Yandi zaba, mpe ya kele ve na kima ke tambula ve mbote na yina Yandi—Yandi kubikaka na kusala. Yawu nyonso fwana kusalama. Ya fwana vwanda, na bantangu yankaka, bima ya mpasi mpe ya ngolo, samu kaka na kubasisa ya kieleka, nkadulu ya kieleka ya kima.

78 Beno zaba, mvula ke butamaka na kuningana ya mazulu, ya kukabuka, ya bidimbu ya balusyemo, ya makelele ya bidumu. Mpe kana beto kuzwa ve mvula, beto zolaka zinga ve. Kasi beno me mona yinki ya ke bakaka na kunata mvula?

Bidumu, balusyemo, banzasi, nkele. Mpe na ngaanda ya kuna ke kwiza mvula.

⁷⁹ Nkuna fwana kufwa, kupola, kubola, kubasisa nsunga, mpe kuvutuka na fundu-fundu ya ntoto, samu na kubasisa luzingu ya malu-malu.

⁸⁰ Ya ke lombaka kubula mingi ya wolo, kubaluka mpe kubaluka dyaka, na manima mpe na ntwala, mpe ke bulama tii mvindu nyonso ke katuka na yawu. Ya kele ve samu ti ya ke na kulezima, samu kisengo ya pyrite, yina ba zaba mutindu wolo ya bulawu, ke kupela mutindu wolo ya kieleka. Kasi, beno tula bawu nyonso zole kintwadi. . . beno tula bawu na lweka mosi, na mpasi beno ke lenda na kuswasikisa bawu na mosi mosi, kasi beno tula bawu kintwadi, beno ke lenda na kuswasikisa yawu. Mpe yina ke bulaka ntangu nyonso fwana kubula tii yandi—yandi ke mona kifwanukusu ya yandi mosi kutalana na kati ya wolo.

⁸¹ Mpe Nzambi ke kubikaka ntangu mpe ke na lukanu samu na nyonso yina Yandi ke salaka. Ya kele ve na kima ke salamaka kaka mutindu dyambu yina beto kulinaka beto kaka samu na bayina ke zolaka Mfumu mpe bayina me bokilamaka landila lubokilu ya Yandi. Beno me mona? Beto kele bayina vwandaka na lukanu ya ntete ya Nzambi. Mpe nyonso ke tambulaka kaka mbote, samu na yina, samu ti Yandi kele na luvunu ve. Mpe Yandi tubaka ti ya vwandaka mutindu yina, ti nyonso ke na ntangu ya yawu, nsungi ya yawu, mpe ya ke na mutindu ya yawu. Mpe Nzambi kele na manima ya nyonso yina ke salamaka. Mpe bantangu yankaka beno ke banza ti nyonso ke na kutambula mbote ve. Ya me tala beno. Bima yango me tulama na zulu ya beto, bakumekama mpe maketi-keti. Ya kele kuteza, samu na kumona mutindu beto ke sala na zulu ya dyambu.

⁸² Mwa bilumbu me luta, kuna na Vermont, Mpangi Fred mpe munu kwendaka na lweka ya New York, na lweka yankaka ya Dyanga ya Champlain, mpe beto kumaka na lweka ya New York. Mpe mu mataka na zulu ya mongo kisika yina, na zulu ya Mongo ya Hurricane, kisika mu vwanda zombaka. Mpe kuna mu ke bambuka moyo ntangu mu zimbanaka, mpe mutindu Nzambi twadisaka munu na kuvutuka, kaka na nzila ya Mpeve-Santu yandi mosi, na nzila ya kitembo. Ti, mu zola kufwa, kufwa, mpe mutindu mosi ya zolaka vwanda samu na kento ya munu mpe Billy, na yisi ya mwa camp katuka bakilometele kuna. Mpe mu vwandaka ve ya kusikama.

⁸³ Mpe ya vwandaka kaka na mwa mvula ya mpembe yina beto sabukaka, samu na kukuma na camp, na ntwala ya nsungi ya printemps. Mpe mu vwandaka ya kutelama kuna vwandaka zonza na Mpangi Fred, mpe Mpeve-Santu tubaka, “Kwenda na lweka nge mosi.” Mpe mu kwendaka na mwa- bayinti mwa ntangu fyoti, kisika mosi. Yandi tubaka na munu, “Ya kele

na mutambu ba me kubika samu na nge. Sala keba ntangu yayi.” Kasi Yandi tubaka ve na munu wapi mutindu, yinki. Mu vutukaka mpe tubaka na Mpangi Fred.

⁸⁴ Mu kwendaka na dibuundu na nkokila yina na dibuundu, mu zabisaka yawu na bantu. Mpe nkokila yina vwandaka landa ya kusalamaka. Mpe kuna ya kutelama kuna ntangu Yandi tubaka na munu, na zulu ya mwa bantu yina ke seka yayi, Yandi tubaka, “Ya kele na maboko ya nge. Yina nge ke sala na bawu. Nyonso yina nge ke tuba, ke salama kaka ntangu yayi.”

⁸⁵ Beno bawu yayi. Kisika, muntu ya kukondwa buzitu, ya kukondwa kinzambi, mpe bawu vwandaka sakana mpe vwandaka seka-seka na lukutakanu, ntwenya ya bakala mpe ntwenya ya kento. Mpe yandi vwanda meka na kusala busafu kuvukisa nzutu na yandi na kati ya dibuundu; mpe kubenda mabanza ya bantu nyonso, na yina mu vwandaka meka na kulonga. Mpe yandi vwanda benda yintu ya yandi na manima mpe vwanda mata na makulu ya yandi, mpe vwandaka losa yintu ya yandi na manima mpe kumeka na kupesa yandi bezé, mpe vwandaka landila mutindu yina na kati ya lukutakanu, na kubendaka mabanza.

⁸⁶ Mpe Mpeve-Santu tubaka, “Ntangu yayi yandi kele. . . Ba kele na maboko ya nge. Yina nyonso nge ke sala na bawu?”

⁸⁷ Ya vwandaka na swi mosi ya santu. Bantu nyonso vwandaka swi mutindu ya kufwa. Mpe mu banzaka, “O Nzambi, yinki mu fwana kusala?”

⁸⁸ Kuna mu me bambuka moyo, kana ya vwandaka ve kusala keba ya Mpeve-Santu, bilumbu zole na ntwala. Mu tubaka, “Mu ke lemvokila beno.” Ntangu yayi, ya vwandaka yina Yandi zolaka ti mu tuba. Beno me mona?

⁸⁹ Samu ti, na manima ya nyonso, mu—mu zabaka dyambu, ya lenda vwanda yina ve, kasi mu zabaka dyambu. “Mpe kuzaba dyambu fyoti kele kuzaba ya muvimba.”

⁹⁰ Na yawu mu tubaka, “Mu me lemvokila beno.” Mpe ya kele na bambangi ya kuvwanda awa ntangu yayi, bayina vwandaka kuna na ntangu yango. Na yina Mpeve-Santu me kota.

⁹¹ Ntangu yayi, beno me mona, mu ke kwikila ti bima nyonso yayi zola kutuba kima mosi. Yinki beno ke sala na ngolo? Wapi mutindu beno ke sala, beno me mona, mutindu ya kusala na kisalu? Kima yina me salama mutindu na kisalu, na yina wapi mutindu beno ke sala na ntwala ya kisalu yina? Beno ke na kubakula yina mu zola kutuba? Yinki beno ke sala? Mpe ya lenda vwanda ti nyonso yayi me salama samu na kunata beto na kisika beto kele ntangu yayi. Mu zaba ve. Mu—mu lenda kaka ve kutuba. Kasi ntangu nyonso nzila mosi ke vwandaka. . .

⁹² Mpe beno bambuka moyo ti, nsoni ya—ya Ndinga ke. . . Ndinga konso ntangu ke kuzwaka nsoni. Nzila nyonso ya

bansungi, Ndinga ya Nzambi ya kukusa ke kuzwaka ntangu nyonso nsoni. Mpe ya kele samu na yina ya kele mpasi mingi samu na bantu yina ke bakulaka ve, na kuzaba mutindu ya kundima nsoni yango.

⁹³ Beno lenda bambuka moyo na bilandi na kuvutukaka mpe vwandaka yangalala samu ti ba kumitalaka ti ba tangaka bawu ya kulunga na kunata nsoni ya Nkumbu ya Yandi? Yandi tubaka, “Bayina nyonso ke zinga na kinzambi na Klisto ba ke talisa bawu mpasi,” nsoni ya Ndinga.

⁹⁴ Beno ntangu nyonso ke kuzwa nsoni yayi samu na kuteza ya beno, samu na kumona. Muntu nyonso yina ke kwiza na Klisto fwana vwanda ntete mwana yina ba me longa mbote-mbote, samu—samu na lukanu yina Nzambi tumaka samu na beno. Mpe beno bambuka moyo, kana beno lenda vwanda kaka swi! Beno bambuka moyo, kana Yandi bokilaka beno samu na yayi, ya kele na kima ve yina lenda kanga yawu na kusalama ve. Ya kele ve na bampeve mingi ya yimbi na kisika ya kukwamisa, kasi yina Ndinga ya Nzambi me tuba ke monisama pwelele. Beno me butama samu na lukanu mosi, mpe muntu ve lenda baka kisika ya beno. Beno lenda kuzwa bilanda-landa mpe nyonso yankaka yina, kasi ata mbala mosi ve ti ba ke baka kisika ya nge. Kieleka. Ndinga ya Nzambi ke nunga. Yawu lenda ve kukondwa. Ya kele kisika konso Muklisto fwana telama, na kuzabaka yawu—yawu. Mpe bakumekama ke kwiza, mpe ke monana na mutindu nyonso, na beno. Kasi beno bambuka moyo, Nzambi ke na lukanu, mpe yawu nyonso ke salama na mutindu ya kulunga.

⁹⁵ Ntangu yayi beto vutuka kaka na manima na kutala mwa mambu ya Ndinga ya Nzambi yina kusalamaka, mpe bayina nataka Ndinga na nsungi ya bawu.

⁹⁶ Mu—mu talaka na Kimpeve, ntama mingi ve, ti muntu mosi vwandaka tonga munu. Ya zolaka vwanda na yinsi ya babande manietiki. Samu ti ntangu nyonso mu ke vutukilaka mingi, ke vutukaka mpe ke bakaka bantu ya Biblia landila yina mu ke na kutubaka. Mbote, mu ke sala yawu na lukanu. Biblia ke tuba ti bima yayi kele ya kusonama samu ti beto kutala na yawu. Mpe ya kele kaka mutindu, kukondwa kulongoka, mutindu kaka mu lenda sala, kele kutala na manima mpe kutuba, “Beno me mona kisika *yayi* kele, yinki kusalamaka na nzila ya yawu, kisika *yayi* kusalamaka.” Beno me mona? Mpe kuna beno ke tula kaka beno mosi na kati kuna.

⁹⁷ Mutindu mu vwandaka longi, ntama mingi ve, na zulu ya mwa mwana ya bakala na maswa, beno zaba, mpe—mpe kapita ya kiboba vwanda kufwa. Yandi vwanda bela. Mpe yandi yufulaka kana ya vwandaka ve na Biblia na maswa. Mpe ba kuzwaka mwa mwana ya bakala yina vwandaka na Biblia, mpe yandi kwizaka mpe tangaka Ésaie 53:5. “Yandi lwalaka samu na masumu ya beto, ba nyokolaka yandi samu na disumu ya

beto ya nko.” Mpe yandi tubaka, “Bika . . . Bika mu tuba na nge, kapita, mutindu ti mama ya munu vwanda tangaka yawu.” Yandi tubaka, “Tala mutindu yandi sonikaka yawu: ‘Yandi lwalaka samu na disumu ya nku ya Willy Pruitt. Mpe ba pesaka Yandi kitumbu samu na Willy Pruitt. Mpe bima nyonso yina Yandi salaka, vwandaka samu na Willy Pruitt.’” Yina vwandaka nkumbu ya yandi.

Kapita ya kiboba yina tubaka, “Mu zola yawu. Nge lenda tanga nkumbu ya munu na yawu?”

⁹⁸ Yandi tubaka, “Mu ke meka.” Mpe yandi tubaka, “Yandi lwalaka samu na masumu ya John Quartz. Yandi kuzwaka kitumbu samu na disumu ya nku ya John Quartz. Mpe na bamputa ya Yandi John Quartz kubelukaka.”

Yandi tubaka, “Mu me mona yawu.” Mpe Mfumu kubelusaka yandi. Beno me mona?

⁹⁹ Beno tanga nkumbu ya beno na kati kuna. Yandi lwalaka samu na masumu ya William Branham. Yandi kuzwaka kitumbu samu na disumu ya nku ya William Branham. Yandi salaka yawu samu na munu, mpe Yandi salaka yawu samu na beno. Beno tanga nkumbu ya beno na kati ya yawu.

¹⁰⁰ Mbote, ya kele mutindu mu ke zolaka kunata Masonuku na bantu ya munu—ya munu, ya kele yina Yandi salaka samu na muntu nyonso yankaka yina ke tumama na Yandi. Yina Yandi salaka na muntu yankaka yina vwandaka ya kukwikama na Dyambu, mpe yina Yandi salaka na muntu yankaka yina vwandaka ya kukwikama ve na Dyambu, kuna beno tanga nkumbu ya beno na kati ya yawu. Kana beno vwandaka kuna, wapi lweka beno zolaka baka? Mpe beno bambuka moyo, beno ke na ntangu ya mbote-mbote, bubu yayi, na kubaka mutindu mosi ya kisika.

¹⁰¹ Ntangu, Noé, na nsoni ya Ndinga yina Nzambi zonzaka na yandi. Noé, ya vwandaka na nsoni. Noé vwandaka zinga na nsungi ya luzabu ya yinza, kisika ya vwandaka na balunungu ya science ti ba vwandaka na lenda ya kusala, ya vwandaka ya kulutula nyonso yina beto ke sala bubu yayi. Ba vwandaka na mayela, na mayela mingi. Science ya bawu vwandaka ntama mingi na ntwala, na ya beto. Mpe beno bambuka moyo, yandi zolaka telama na nsoni ya Ndinga yina yandi vwandaka longa, nkama mosi na makumi zole ya bamvula, na ntwala ya bantu ya masawula. Mitindu ya luzabu ya yinza ya bawu ya nene lakisaka bawu ti ya vwandaka ve na mvula na mazulu. Kasi, dyaka, Noé kuwaka Ndinga ya Mfumu, mpe Yawu vwandaka ya kuswaswana na dibanza ya bawu na Yawu. Na yawu, ntete luzingu ya yandi kuzwaka mpulusu, yandi zolaka telama na ntwala mpe kuzwa nsoni yina bayina ke seka yayi vwandaka sala yandi.

¹⁰² Oh, ya kele na ata ntembe ve, ba zolaka tala kyadi mulongi ya kiboba ya mawa yayi. Ba kangaka yandi ve to nyonso, samu ti mu banza ya vwandaka ve na bayinzo mingi ya mutindu yina na kilumbu yina. Yandi vwandaka pesa boma ve. Yandi zolaka sala muntu mosi ve mpasi, na yawu ba bikaka kaka yandi mosi swi. “Kwenda na ntwala, kiboba ya fanatike kuna na zulu na lweka ya mongo yina, ke tunga maswa awa kisika ata mvula kele ve. Oh, mbote, kiboba ya mawa! Kasi,” mpe bawu vwandaka tuba, “wapi kisika nge ke kuzwa maza, samu na maswa ya nge kuvwanda na zulu ya maza, Noé?”

“Ya ke kulumuka na mazulu.”

¹⁰³ “Buzoba. Beto lenda kwenda na ngonda mpe na bambwetete, na radar,” nyonso yina vwandaka na bawu. “Ya kele ve na mvula na zulu kuna.”

Kasi yandi tubaka, “Nzambi tubaka ti Yandi ke tula ndambu na zulu kuna.”

“Wapi mutindu Yandi ke sala yawu?”

¹⁰⁴ “Yina kele dyambu ya Yandi. Kima mosi kaka yina mu fwana sala ya kele kupesa beno malongi na kukatuka awa.”

¹⁰⁵ Ya kele kaka na kutala mutindu mosi ntangu yayi. “Wapi kisika ke katuka tiya?” Mpangi, ya kele mwa pwelele bubu yayi kulutula na yina vwandaka na ntangu ya Noé. Beto ke mona yimeni kisika ya kele. Ya kele kaka ya kuyilama na kupasuka, kaka yina. Luzabu ya yinza yimeni me. . . Ya kele na dyambu yankaka ya kutuba ve na ntangu yayi, ata fyoti ve, samu ti luzabu ya yinza me kuzwa yawu yimeni. Yinga, tata.

¹⁰⁶ Na yawu ntangu yayi beto me tala ti ya vwandaka kwandi kima mosi. Na yawu ba talaka mulongi ya kiboba ya mawa yayi kyadi, mpe bikaka kaka yandi kukwenda. Ya vwandaka kima ya mutindu yankaka, mu banza, samu na bantu yina, na kubanza ti muntu yina zolaka vwanda na mayela, mpe zolaka kwikila ti Nzambi, Kiyidiki ya mazulu mpe ntoto, zolaka sala kima mosi, to kutuba kima mosi yina Yandi zolaka sala, yina vwandaka ya kuswaswana na mutindu ya bawu ya kubanza, na yina vwandaka na bawu. Ya lenda vwanda ti beno me bakula yawu ve. Beno tala. Vwandaka. . . Ba vwandaka banza ti ba lendaka lakisa konso kima ya yinza na luzabu ya yinza ya bawu. Kana ya kele ve mutindu ya yinza yina beto ke na kuzinga bubu yayi, yinza ya mayela, ya malongi ya kufulukuka na luzabu ya yinza! Mpe nyonso yina ba zolaka lakisa, ya vwandaka luvunu, ya Nzambi. . . “Ve Nzambi zolaka kuzonza ntete ve kima yina (vwandaka) zolaka vwanda ya kulakisa na luzabu ya yinza ti ya vwandaka ve kuna.”

¹⁰⁷ Ntangu yayi, ba ke na dibanza mosi bubu yayi. Kana dokotolo ya beno kutuba ti beno ke na cancer, ti beno fwana kufwa, mpe ti luzabu ya yinza kulakisa ti beno ke na cancer, mpe ti ya kele na kitezo ya ntwala, ya kele buzoba na kubanza

kima yankaka, samu ti beno ke na kufwa; kaka yina. Science me tuba ti beno ke kufwa. Bawu me tala beno, mpe ya kele nyonso ya yawu. Beno ke kufwa. Mpe ba ke banza ti ya kele bulawu kana beno meka na kutuba ti Nzambi silaka na kusala yawu. Beno me mona, mutindu ya vwanaka, beno fwana kukwenda na ntwala ya nsoni yina.

¹⁰⁸ Ba tubaka, kana dokotolo tubaka awa, “Beto me tala mbote, mpe cancer me kwenda na ntwala. Beto me fungula nge. Ya me kota na nzutu ya nge nyonso, mpe me kota na ntima ya nge, tii na mafulu ya nge, tii na dizafu ya nge, nyonso. Ya lenda salama ve.”

Na yawu, beno me mona, ntangu beno ke tuba, “Kasi yandi ke zinga, na mutindu nyonso.”

Ba ke tuba, “Mbote, muntu ya mawa, beno bika kaka yandi.”

¹⁰⁹ Mu ke bambuka moyo na nkokila mosi. Bill Hall, Mpangi ya bakala Hall kuna na dibuundu ya Milltown, mingi ya beno ke bambuka moyo na dyambu yango. Mpe ntangu yandi. . . Ba bokilaka munu. Kento ya munu, mpe bokilo ya munu ya kento mpe munu, kwendaka awa. Yandi kwelaka mwana mosi ya kento yina vwanaka mpangi ya kento, mu banza, ya George Cupp, yina vwanaka mfumu ya mbanza, to zuzi awa. Ya yandi. . . Ya vwanaka munzadi ya yandi ya bakala. Ba nataka yandi awa samu na kufwa. Dokotolo na Milltown, dokotolo na New Albany, fyongoninaka dyambu ya yandi mutindu cancer ya dizafu. Na yawu mu kwendaka samu na kumona Madami Hall. Mpe yandi vwanaka na jaunice, mpe yandi vwanaka kulere ya mwamba ngazi bisika nyonso. Mpe mu tubaka, “Mbote, mu banza ti yandi ke kufwa.” Mpe mu tubaka. . .

¹¹⁰ Yandi tubaka, “Mpangi Bill, ya lenda vwanaka na mutindu yina. . . Nge lenda kuwa nzila ya Nzambi?”

Mu tubaka, “Mu—mu zaba ve, Mpangi-kento Hall. Mu lenda sambila.”

¹¹¹ Mu sambilaka. Mpe mu vutukaka na yinzo, mpe Mfumu tubaka kima mosi ve na munu. Na yina mu vutukaka, kilumbu yina vwanaka landa, mpe mu sambilaka dyaka.

Mpe yandi tubaka, “Nge zaba dokotolo mosi ya mbote?”

¹¹² Mu tubaka, “Mbote, dokotolo ya beto ya dibuta kele Docteur Sam Adair, awa na Jeffersonville. Yandi kele—yandi kele—yandi kele. . . Tata ya yandi vwanaka dokotolo ya beto ya dibuta. Ntwenya Sam mpe munu ntangu nyonso vwanaka vwanaka bankundi ya mbote, mpe—mpe beto kwendaka na lukolo na kutala na ntangu mosi, beto kulaka kintwadi. Beto ntangu nyonso vwanaka kwenda na yandi ntangu kima mosi vwanaka mbote ve.”

Yandi tubaka, “Mu ke kumiyufula kana yandi ke ndima na kwiza tala Bill Hall?” bakala ya yandi.

Mu tubaka, “Mu ke yufula yandi.”

113 Mbote, Sam tubaka na munu, yandi tubaka, “Billy, kana dokotolo tuba ti yandi kele na cancer,” yandi tubaka, “ya kele kaka na kima mosi, mu ke sala, mu ke fidisa yandi na muntu yina kele na mayela kulutila munu, na spécialiste. Mpe beto ke nata ba-radio; mpe beto ke tula yandi dyaka ve na yisi ya mpasi.”

114 Beto fidisaka na New Albany mpe kuzwaka ba-radio yina katukaka na dokotolo na yisi kuna. Beto nataka yandi na Louisville mpe salaka yandi kizama, ba nataka yandi kuna mpe ba vutulaka yandi, na ambulance.

115 Mbote, kieleka, yandi zolaka ve kutuba na Madami Hall yinki vwandaka mpasi ya yandi, na yawu yandi bokilaka munu. Yandi tubaka, “Yandi ke kufwa,” yandi tubaka, “nkundi ya nge ya mulongi.” Yandi tubaka, “Muntu ya diyela na Louisville vwandaka me katuka na kubokila munu, mpe yandi me tuba, ‘Kizama yina badokotolo pesaka na—na. . .kuna na Milltown; mpe dokotolo, na New Albany; pesaka kizama ya mutindu ya kulunga.’” Mpe yandi tubaka, “Ya kele cancer ya dizafu, mpe ya me kuma na ntwala. Mpe, Billy, beto lenda katula ve dizafu ya muntu, mpe yandi kuzinga.” Yandi tubaka, “Yandi ke kufwa. Mpe kana yandi kele mulongi, yandi fwana kukubama.”

116 Mu tubaka, “Kyuvu kele yina ve. Kasi yandi me luta ve mu banza bamvula makumi tanu na tanu, na yawu yandi kele dyaka na luzingu mingi dyaka na kati ya yandi, samu na kulonga.” Mpe mu tubaka, “Mbote, kana yandi ke kufwa, yina ke sukisa dyambu kuna. Matondo na nge, Docteur Sam.”

117 Mpe mu kwendaka mpe bokilaka Madami Hall, mpe tubaka na yandi. Mu tubaka, “Mama Hall, Sam me tuba ti kizama ya Louisville vwandaka mutindu mosi na yina vwandaka na New Albany mpe Milltown. Muntu ke na kufwa. Mpangi Hall ke kufwa. Mpe yandi kele na cancer na dizafu, mpe ya me kuma na ntwala.”

118 Mpe na yawu yandi bandaka na kudila. Mu me baluka, me sambila na yandi. Mpe yandi vwandaka mutindu mosi, ti, tii yandi vwandaka zaba ve ti mu vwandaka na kati ya kivinga.

119 Na yawu, mu vutukaka. Mpe na bilumbu yango, bantu mingi vwandaka kwiza na yinzo. Ya vwandaka dyaka ve na muntu yankaka na mfinda ya kumwangisa nsangu. Ya vwandaka ntete ve ya kupola mingi, mpe bantu vwandaka katuka bisika nyonso.

120 Mu vwanda sosa kupema fyoti. Na yawu mu me kota, me vumbuka na suka-suka, pene ya ngunga zole na ndambu, to ngunga ya tatu. Mpangi Wood vwandaka ntete ve na bala-bala. Mpe mu me tala na mwa-nzila, mpe ya vwandaka na ata, muntu mosi ve vwandaka na ngaanda kuna, na yawu mu bakaka yimpu ya munu ya ntama mpe kotaka na bilo, mpe bakaka munduki ya munu ya .22. Mpe mu vwanda zola kukwenda na kuzomba bampadi, tii ya ke kuma pene ya ngunga nana, mpe kuna kulala

na yisi na lweka ya yinti mosi kisika mosi mpe ti mu lala fyoti. Beno zolaka lala ve na yinzo.

¹²¹ Mu bakaka yimpu ya munu mpe bandaka na kukwenda na lweka yankaka ya kivinga. Vwandaka ya kukanga na kibaka pomme. Mpe ya vwandaka pomme ya kulutila kupola. Ya vwandaka ya kudyana na banyama, mpe ya vwandaka ya kubeba mingi, mpe ya vwandaka nyonso ya kuyela mbote ve. Mpe mu banzaka, “Samu na yinki Méda kangaka yawu na kibaka?”

¹²² Mpe mu talaka, dyaka, mpe ya vwandaka ve na kibaka. Ya vwandaka ya kukanga na mupepe. Mu me katula na nswalu yimpu ya munu ya ntama, me tula na lweka munduki, mpe me fukama. Mu tubaka, “Mfumumu, yinki Nge zola ti kisadi ya Nge kuzaba?”

¹²³ Kuna me kulumuka yankaka, kuna me kulumuka yankaka, tii pene ya ba-pomme yiya to tanu (mu me zimbana kaka ntangu yayi wapi lutangu ya vwandaka) ya kukanga kuna. Na manima pomme ya nene ya kuvimba, ya kitoko, na banzila na yawu; kaka pomme ya nene mingi, na kutala ya mavimpi ya mbote, me kulumuka mpe me mina ba-pomme yango yankaka yina vwandaka talana yimbi. Mpe Yandi tubaka, “Vumbuka. Telama.” Yandi tubaka, “Kwenda, tuba na Bill Hall, yandi ke kufwa ve. Yandi ke zinga.”

¹²⁴ Oh, mu kimaka na nswalu mutindu mu lendaka, mpe mu tubaka, “Mama Hall, mu me kuzwa MUTINDU ME TUBA MFUMU. Yandi ke zinga.” Mpe yandi kuwaka munu. Mpe yandi vwanda meka na kudila, mpe yandi vwandaka lenda dyaka ve na kutuba.

¹²⁵ Mu vutukaka mpe bokilaka Sam. Mpe mu tubaka, “Sam, mpangi ya beto—ya beto ke zinga.”

Yandi tubaka, “Wapi mutindu yandi lenda zinga mutindu yina?”

¹²⁶ Mu tubaka, “Ya kele na munu ve na kuzaba mutindu. Nzambi me tuba mutindu yina. Yina ke sukisa dyambu.”

¹²⁷ Yandi ke zinga bubu yayi. Ya me luta pene ya bamvula kumi. Kaka ya ngolo na mavimpi ya mbote. Kento ya yandi kufwaka katuka. Yandi me kwela dyaka.

¹²⁸ Wapi mutindu ya kuminaka na George Wright, mpe mingi dyaka yina beto lendaka tuba, yina beto lenda bokila? Yinki ya kele? Ya kele kutelama na ntwala ya nsoni. Bawu ke seka mpe ke vweza.

¹²⁹ Mu ke bambuka moyo ntete kufuluka ya ngolo ya maza na 1937. Mu vwandaka kuna na Falls City Transfer Company, mpe vwandaka tuba na bawu, ti ya zolaka vwanda na bametele kumi ya maza, mu banza ti ya vwandaka, na Bala-bala ya Spring. Ba sekaka munu. Ba tubaka, “Billy ya mawa. Mu banza ti yandi. . . Mwana yina!” Mu vwandaka mwa mwana ya bakala kuna. Yandi

tubaka, “Billy kele mwana ya mbote. Ya kele nsoni ti yandi me zimbisa mabanza.” Mu vwandaka me zimbisa ve mabanza. Mu kuzwaka mbotika *na kati*, mu zimbisaka ve mabanza. Mu vwandaka kaka “na kati.” Mpe ya salamaka kaka mutindu yina.

¹³⁰ Tuka mu ke na kutuba, mu ke na kutala Mpangi-kento Hattie Wright, mu banza, ya kuvwanda na manima kuna. Yandi me bambuka moyo na dyambu ya Bill Hall. Mingi. Bantu yikwa kele awa, yina kele awa na suka yayi, ke bambuka moyo na dyambu yango? Oh, la la! Kieleka. Ya kele na mingi ya beno.

¹³¹ Ntangu yayi, ba ke tala beto kyadi, ba ke tala kyadi na muntu nyonso yina ke meka na kukangama na Ndinga, na bilumbu ya bantu ya masawula. Kasi, beno bambuka moyo, nsoni fwana kwiza. Ya ke vwandaka mutindu yina ntangu nyonso. Ba zolaka banza ti, mutindu ba salaka kuna, ti Nzambi, na manima ya nyonso zolaka talana na nzila ya science, ti Nzambi zolaka zonza ve kima yina zolaka telemina science. Mbote, ya kele yina ke salaka Yandi Nzambi. Kana Yandi zolaka kaka kukwenda landila science, na yina ya zolaka vwandaka dyaka ve ti kaka yina muntu lendaka sala. Kasi, Yandi kele Nzambi. Yandi kele—Yandi kele Kiyidiki ya luzabu ya yinza. Yandi lenda sala yina Yandi zola.

¹³² Ba zolaka banza, “Noé kiboba ya mawa, mbote, beno bika kiboba swi. Yandi ke na kukondwaka mukembo nyonso yina beto ke na kuzwaka na bilumbu yayi, na yawu beno bika kaka yandi swi.” Ya kele na kutala mutindu mosi ntangu yayi.

¹³³ Kasi, ntangu yayi, mu zola kutuba kima yankaka kaka awa. Ntangu yayi, beto ke tala manima mpe ke zola mingi lukwikilu ya yandi. Kasi mu ke kumiyufula, kana beto zingaka na kilumbu yango, beto zolaka baka kisika mosi yina Noé bakaka? Beto zolaka lenda mpe zolaka telama na ntwala ya nsoni yina vwandaka tambula na Kieleka? Na yina, na ba-milio nyonso yina vwandaka na yinza na ntangu yina, ya vwandaka kaka na Noé mpe dibuta ya yandi yina telamaka na ntwala samu na Kieleka yango. Beno me banzaka na yawu? Kaka bakala yina mpe bana ya yandi ya babakala tatu, mpe babokilo ya yandi, kento ya yandi, vwandaka kaka yina telamaka na ntwala samu na Kieleka yango. Kasi ba vwandaka na MUTINDU ME TUBA MFUMU. Beto ke tala na manima mpe ke zola yandi. Beto lendaka banza na yawu diaka?

Mu fwana sala mbangu samu na makabu ya bana yayi.

¹³⁴ Abraham, na kieleka mpova *Abraham* zola kutuba “tata ya mingi,” ya ke sala yandi “tata ya bayinsi.”

¹³⁵ Ntangu yayi, Abraham kuwaka Ndinga ya Nzambi. Abraham vwandaka profete, mpe yandi kuwaka Ndinga ya Nzambi. Mpe beto ke zolaka mingi Abraham samu na kukangama ya yandi na Ndinga ya Nzambi; mutindu yina yandi kukabukaka yandi mosi na makanda ya yandi; mutindu ya

vwandaka mpasi samu na Abraham. Yandi kukulaka kuna. Yandi kulumukaka katuka na Babel, mpe—mpe vwanaka na yisi kuna na yinsi ya Schinéar mpe na ba-Chaldéen, na mbanza ya Ur, kisika bampangi ya yandi ya kusalu, bantu ya yandi, mpe bayina kwendaka na yandi na dibuundu, mpe nyonso. Kasi Nzambi tubaka, “Kabuka.” Oh, la la! Wapi kima ya boma ya vwanaka, na kubika bayina nyonso yandi vwanaka zola, nyonso yina vwanaka kieleka na yandi, yina yandi vwanaka zola. Mpe Nzambi tubaka na yandi, “Kabuka nge mosi.”

¹³⁶ Mpe pesaka yandi kima ya kieleka ya mutindu yankaka. “Nge ke kuzwa bébé na nzila ya kento ya nge.” Mpe yandi vwanaka na bamvula makumi sambwadi na tanu, mpe kento vwanaka na makumi sambanu na tanu. Yandi sukaka na kuvwanda mutindu bakento, mutindu bakento yina ke butaka bana, katuka bamvula. Mpe awa, na manima ya kuzingaka na yandi katuka yandi vwanaka mwana ya kento, samu ti yandi vwanaka mpangi ya yandi ya kento ya dibuta mosi, mpe na yina wapi mutindu yandi ke buta mwana yango? Mpe ntangu yayi beno lenda banza Abraham kubasika na kati-kati ya bampangi ya yandi ya kusalu, mpe kutuba, “Beto ke kuzwa bébé, Sarah na munu”? Beno lenda banza yawu?

¹³⁷ Samu na yinki, bantu vwanaka tuba, “Kiboba ya mawa, ya kele na kima mosi ya mbote ve na yandi.”

¹³⁸ Ya kele nsoni, kasi Abraham kutelamaka ngwi. Mpe ntangu yandi vwanaka na bamvula nkama, yandi salaka ntembe ve na nsilulu ya Nzambi. Yandi telamaka dyaka na ntwala ya nsoni, kieleka, yandi telamaka ngwi.

¹³⁹ Beno ke mona luswaswanu na kati kuna? Sarah sosaka na kupesa Abraham, to kupesa Nzambi, na kisika, mwa lusalusu ya fyoti, na yandi mosi. Yandi banzaka, beno zaba, ti, na mutindu yankaka na yina Nzambi silaka. “Ntangu yayi, nge zaba, mu kele kento me nuna, kasi Agar awa kele kento ya kitoko. Abraham ke tala yimbi ve na kukwela yandi, mpe. Na yawu, nge zaba, yina ke—yina ke sadisa Nzambi. Ya ke sadisa Nzambi, samu ti Agar, awa, yandi mu banza kele kaka na bamvula makumi zole. Yandi kele kisadi ya munu ya kento. Mpe nge zaba yinki mu ke sala? Mu ke pesa yandi na bakala ya munu, mutindu kento,” samu ti polygamie vwanaka ya kulunga. Na yawu yandi tubaka. . . “Mu ke pesa yandi, mpe yandi ke kuzwa mwana na nzila ya bakala ya munu, mpe na manima mu ke baka bébé. Mpe ya ke vwanda yandi yina, Nzambi silaka.”

¹⁴⁰ Beno me mona, beto ntangu nyonso ke mekaka na kusala kima mosi; beto ke lendaka ve na kuvingila na Yandi. Beto fwana kusala kima mosi, beto mosi. Ya lendaka vwanda nyonso ya kulunga. Yandi lendaka vwanda kitoko. Ya lendaka talana kieleka mbote, kasi ya vwanaka ve landila Ndinga. Nzambi tubaka na Abraham ti bébé ke kwiza na nzila ya Sarah.

¹⁴¹ Beno ke bambuka moyo na yina Yandi tubaka na mwa Mameme? “Bidimbu yayi ke landa bayina ke kwikila.” “Mutindu ya vwandaka na bilumbu ya Noé, mutindu mosi ya ke vwanda na nkwezulu ya Mwana ya muntu, kisika ndambu, kaka mioyo nana, kuvulukaka.” Bampova yango lenda kondwa ve, na yawu beto kumitala beto mosi mbote mpe beto vwanda na Ndinga. Mbote mingi. Beno me mona?

¹⁴² Bantu ntangu nyonso ke mekaka na kusala kima mosi, samu na kubaka kisika ya kuyidika ya luzolo ya Nzambi. Beno me mona, mutindu mu ke tubaka bambala mingi, mpe mu banza, ntete, na ntwala ya dibuundu, beno zaba, beno lenda ve kulomba na dimeme, “Nge zola kusala samu na munu mwa mika?” Ve, yandi lenda ve kusala yawu. Ntangu yayi, nkombo lenda ve kusala mika, samu ti nkadulu ya yandi lenda bika yandi ve. Ata lutangu ya mika yina beno ke meka na kukanga na zulu ya nkombo, ya ke simba ve. Nkombo lenda ve kusala mika, mpe dimeme ke salaka ve bansuki. Kasi yandi ke na mika samu ti yandi kele dimeme. Ya kele yina ke salaka yandi. Yandi ke salaka ve.

¹⁴³ Beto zola ve kusala bambuma ya Kimpeve. Beto zolaka pesa kimbangi ya mbuma ya Kimpeve. Yinti ya pomme ke salaka ve ba-pomme; ya ke pesaka kaka kimbangi ya yawu samu ti ya kele yinti ya pomme.

¹⁴⁴ Mpe kana beto meka na kusala kima mosi, “Mu ke sadisa Dyambu. Mu ke longuka bamvula kumi na seminere. Mu ke kuzwa mayela na *yayi*, *yina*, to *yankaka*, mpe kuzwa Licencié na Lettre mpe diplome ya munu ya Doctorat. Mu ke sadisa Mfumu, munu mosi.” Ya ke simba ve.

¹⁴⁵ Nzambi, na kuvwandaka na lukanu ya ntete ya Nzambi, bokilaka yandi yina Yandi zolaka. Yandi ke pesa Kimfumu na yina nyonso Yandi zola kupesa Yawu. Beto longukaka yawu na nzila ya Nebucadnetsar.

¹⁴⁶ Beto longukaka yawu na nzila—na nzila ya Jérémie, ntangu Nzambi tubaka na yandi yawu na nzila ya Ndinga ya Mfumu, ti ya ke vwanda na ntangu yina ba ke nata Israël na Babylone samu na bamvula makumi sambwadi. Awa me kwiza profete yankaka. Yandi tubaka na yandi yimeni, tubaka, “Ntangu yayi, beno ke kuzwa baprofete, bayina ke telama. Mpe beno ke kuzwa bawu kuna na Babylone, bayina ke telama, mpe bayina ke lalaka bandosi mpe baprofete, ba ke pesa baprofesi ya kuswaswana na Yayi. Kasi tuba na bantu na kuwa ve bantu yango.”

¹⁴⁷ Mpe me kwiza bakala mosi na nkumbu ya—ya, mosi ya baprofete, Hanania. Mpe na yina Jérémie vwandaka ya kutelama kuna na kizitu na zulu ya laka ya yandi, me kwiza na Hanania, yandi me tuba, “MUTINDU ME TUBA MFUMU, na bamvula zole, bisadilu nyonso ya Mfumu. . .” Ntangu yayi, na zulu ya nyonso, ya ke monana mbote mingi. “Nzambi ke sakumuna

bantu ya Yandi. Yandi ke vutula bima nyonso kieleka kaka, na bamvula zole.”

148 Mpe Biblia ke tuba, mpe profete Jérémie tubaka, “Amen. Amen. Hanania, ti Mfumu kusala mambu ya nge kusalama. Kasi ti beto banza na kima, Hanania. Ya vwandaka na bapofete na ntwala ya beto, mpe ba pesaka bapofesi ya kutelemina bayinsi ya nene ya mvita, mpe nyonso yina. Kasi, beno bambuka moyo, profete ke zabanaka na manima profesi ya yandi me salama.” Beno me mona?

149 Kuna Hanania me kwiza, me botula kizitu na laka ya Jérémie, na ntwala ya banganga-Nzambi nyonso mpe dibuundu, mu banza ti ya vwanda milio mpe ndambu ya bantu. Mpe me katula kizitu yango yina Nzambi tulaka na zulu ya laka ya Jérémie, mutindu kidimbu, mpe pasulaka yawu na bitini-bitini, mpe me losa yawu na makulu ya yandi, kaka na kati ya kyese, mpe tubaka, “MUTINDU ME TUBA MFUMU, Na bamvula zole, ba ke vutuka.”

150 Jérémie me tala kaka yandi. Ya vwandaka ya kuswaswana na Ndinga, na yawu yandi me kwenda kaka. Mpe Nzambi tubaka, “Vutuka mpe tuba na yandi,” me tuba, “Mu me zonza na yandi ve.”

151 Yandi vwandaka kaka na kati ya kyese. Yandi landaka kumona ya yandi. Beno me mona? Yandi vingilaka ata fyoti ve tii kieleka yandi ke mona yawu mpe kuzaba ti ya vwandaka ve yandi, ti ya vwandaka Nzambi yina vwandaka tuba yawu. Yandi vutukaka, nyonso na kyese. Kana . . .

152 Beto ke mona yawu, bisika nyonso na yinsi, bubu yayi. Mosi ya babande ya beto vwandaka bula ntama mingi ve na yinzo mosi, kisika nkonga mosi ya milongi yina vwandaka me banda na kundima vwandaka, mpe zolaka kwiza na kuzwa mbotika na Nkumbu ya Yesu Klisto. Mpe muntu mosi me telama na kati ya kivinga, yandi zonzaka na bandinga mpe tubaka, “MUTINDU ME TUBA MFUMU. Beno landila na yina kele na beno. Beno landila kaka, kwenda kaka, mpe mu ke sakumuna beno.”

153 Ba tubaka, “Mbote, kana Mfumu me tuba yawu, mu banza ti ya kele yina.” Beno me mona, ba me teza yawu ve na Ndinga. Ba fwana baka Ndinga, ntete. Beno bawu yayi. Ya vwandaka ya kuswaswana na Ndinga.

154 Awa me vutuka Jérémie, profete yango ya kukusa. Nzambi tubaka na yandi, me tuba, “Mu zaba ti Hanania me pasula kizitu yango ya dibaya na zulu ya laka ya nge, yina Mu tulaka, kasi Mu ke sala mosi ya kisengo.” Yandi tubaka, “Mpe bayinsi nyonso yayi yina me kulumuka na kusadila Nebucadnetsar, kisadi ya Munu,” mpe yandi vwandaka mumpani. Beno me mona? Mpe Israël, bumbaka minkayulu ya bawu nyonso, kasi ba vwandaka ve . . . Beno me mona?

¹⁵⁵ Nzambi salaka nsilulu, ti Yandi ke sakumuna, kasi balusakumunu ya bawu kele na yisi ya misiku. Mpe beno fwana kulungisa misiku yango, samu na kusala kisalu yango.

¹⁵⁶ Mu vwandaka ya kuvwanda, mwa ntama mingi ve, na mwa, mwana ya kento ya mbote awa. Ntete, mu me tala dibuta yango nyonso, samu na kumona kana ya vwandaka na kima ya yimbi. Nzambi ke belusa, kasi ya kele na yisi ya misiku. Beno me mona? Kima kaka mu me tala, vwandaka, mama vwandaka na boma ti kubaka bankisi vwandaka yimbi. Mu tubaka, “Kubanza yawu ve, mpangi ya kento. Katula yawu na dibanza ya nge. Kwenda kaka na ntuala na mwana. Pesa yandi bankisi. Nzambi ke zabisa yawu.” Beno me mona?

¹⁵⁷ Ntangu yayi, kasi, kima kele, kuzwa, zaba. Mpe na manima, kana ya kele MUTINDU ME TUBA MFUMU, ok.

¹⁵⁸ Ntangu yayi beto me mona awa ti, bantu yayi, ba vwnda meka na kusala kima mosi. Agar mpe—mpe Sarah, samu na kusadisa Abraham, na kusadisa Nzambi na kusala nsilulu ya Yandi kukuma kieleka. Beno lenda ve kusala yawu. Ya kele, na ata fyoti ve ya nzila, na kusala yawu. Ya kele—ya kele ya kuswaswana na nyonso. Ndinga ya Nzambi ke salama, na mutindu nyonso. Beno fwana telama kaka na zulu ya Ndinga, mpe kutuba, “Ya kele mutindu *yayi*,” mpe beno kangama na Ndinga. Ntangu yayi, beno tala mbote, kusala kima samu na kubaka kisika ya Ndinga ya Yandi!

¹⁵⁹ Mu banza ti bankundi ya Abraham, mpe, kana beto talaka ntete ve, mu banza ti bankudi ya Abraham kwizaka mpe tubaka, “Mbote, tata ya bayinsi, bana yikwa me kuma na nge ntangu yayi?” Na yina yandi vwandaka na bamvula nkama. “Tuba, tata ya bayinsi, tata ya mingi, bana yikwa me kuma na nge ntangu yayi?” Baseki!

¹⁶⁰ Ntangu yayi, beno me mona ntangu ve? Beto me mona yawu ve, ntangu bantangu yankaka ti beto ke sambilaka samu na kima mosi, ya me salamaka ve?

¹⁶¹ “Awa kele ya kuvwanda kiboba ya bakala,” bawu ke tuba. “Yandi kele mpofo. Yandi kele ya kufwa makutu. Yandi kele dibaba. Yandi kele ya kubela. Yandi me sala *yayi*. Kwenda kuna mpe belusa yandi, beno minganga ya Kinzambi. Beto ke kwikila na yawu.”

¹⁶² Ba ke bakulaka ti ya kele mpeve ya yimbi mosi yina tubaka, “Kulumuka na kulunsi, mpe mu ke kwikila Nge. Kitula matadi yayi na dimpa, mpe mu ke kwikila yawu?” Beno me mona? Mpeve mosi yina kangaka Mfumu ya beto meso, mpe bulaka Yandi yinti na yintu, mpe tubaka, “Ntangu yayi, kana Nge kele profete, tuba na beto nani me bula Nge, mpe beto ke kwikila Nge.”

¹⁶³ Mbote, beno zaba ti Yandi zabaka nani bulaka Yandi. Yandi zolaka lenda na kukitula matadi yina na dimpa. To, Yandi zolaka lenda na kukulumuka na kulunsi. Kasi yinki beto zolaka vwanda

bubu yayi kana Yandi salaka yawu? Beno me mona? Ba zaba ve dikani ya Nzambi. Beno fwana kuzwa yina Nzambi me sila.

Ntangu yayi mu fwana kusala nswalu.

¹⁶⁴ Ntangu yayi, ntangu yayi ya lendaka vwanda ti ba tubaka, “Tata ya bayinsi, beto kuwaka nge, bamvula makumi na tanu me luta, kutuba ti nge ke kuzwa mwana na nzila ya Sarah, mpe na nzila ya yandi zolaka kwiza bayinsi mingi ya bantu. Kaka bana yikwa me kuma na nge na ntangu yayi, tata ya bayinsi?” Huh! Beno me mona? Ya kele mpeve mosi yango ya ntama ya kutonga yina ke tonga.

¹⁶⁵ Yinki Abraham kusalaka? Ya ke ya kutuba, “Yandi salaka ve ntembe na nsilulu, ya kukwikama na Nzambi ve.”

“Samu na yinki, awa beno sambilaka na *Kingandi*, mpe yandi belukaka ve.”

¹⁶⁶ Yina kele dyambu ve. Kana mu sambila na kumi ya mafunda na nkokila yayi, mpe ti kumi ya mafunda yango kufwa na suka, mbasi na nkokila mu ke kusa dyaka mafuta na bantu ya kubela mpe ke sambila samu na bawu. Nzambi tubaka mutindu yina. Ya ke sukisa yawu, ata fyoti ve. Nzambi silaka yawu. Mu ke kwikila yawu. Kieleka. Yina ba ke tuba dyaka, ke sala ata luswaswanu ve. Kasi, ba ke sawula. Ya kele nsoni ya Ndinga.

¹⁶⁷ Abraham, na kutelamaka na Ndinga ya Nzambi, na nsuka Yawu kusalamaka. Oh, la la!

¹⁶⁸ Beno tala mbote kuseka ya busita. Na kuvwandaka ya kuseka, mpe nsoni ya busita, ntete. Ba kuzwaka. . . Yandi zolaka telama na ntwala ya nsoni ya kuvwandaka kisita ya kento na bamvula nyonso yango. Yandi vwandaka pene ya nkama ya bamvula. Yandi vwandaka na makumi yivwa, na Ndinga ya Nzambi yina tubaka ti yandi ke vwanda mpe *mwana ya kento ya ntinu*, mama ya mwana yayi. Mpe yandi mpe Abraham, bisita, banzutu ya bawu—ya bawu zole vwandaka mbote mutindu ya kufwa, kasi dyaka ba salaka ve ntembe na Ndinga yango, ata fyoti. Kasi ya lungaka ti ba telama na ntwala ya yawu, ntete. Mpe kuna, alleluia, Nzambi kukangamaka na Ndinga ya Yandi, na kati ya ngunga yango ya mpimpa: Isaac kubutukaka. “Mpe nkuna ya yandi kele mutindu zyelo ya mubu to ya bambwetete ya Mazulu.” Beno me mona? Nzambi ntangu nyonso ke pesaka mvutu na Ndinga ya Yandi. Yinga. Busita ntete, na manima Isaac.

¹⁶⁹ Zacharie mpe Élisabeth, mutindu mosi, kiboba ya bakala yina mpe kiboba ya kento, kutatamanaka dyaka. Mpe ntangu Zacharie kubasikaka kuna, mpe sonikaka na dibaya ya yandi, mpe tubaka, “Wanzio mosi me kutana na munu, me tuba na munu ti mu ke buta na nzila ya Élisabeth, kento ya munu ya kiboba awa. Mu lenda dyaka ve kuzonza. Mu me kuma dibaba. Mu ke vwanda dibaba tii kilumbu mwana ke butama. Kasi ya ke na kwiza mwana, mpe yandi ke vwanda profete ya Mazulu. Yandi

ke lakisa Mbwetete ya Suka. Yandi kele yina kotaka na ntwala Mesiya.” Wapi mutindu ya lendaka vwanda?

¹⁷⁰ Bayankaka tubaka, “Kiboba ya mawa. Oh, mu—mu banza ti yandi me zimbisa mabanza ya yandi, beno zaba. Ya kele kima ya fyoti. Kasi beno tala kuna kiboba ya Élisabeth, pene ya makumi nana. Mpe beno tala—tala—tala Zacharie, ya kukula mingi mpe vwanda tekitaka, mpe kuna yandi ke na kutuba kima mutindu yina. Mbote, kiboba ya mawa.”

¹⁷¹ Kasi bakala kuzwaka Ndinga ya Mfumu. Mutindu ya nsoni, tii kento kubumbamaka bamvula mingi. Kasi bakala kukangamaka na Ndinga. Oh, la la!

¹⁷² Kumangaka ya kuvwanda ya kuzabana, kumangaka dibanza ya bantu, mangaka kubongisa ya kilumbu, mpe mitindu mpe bima ya kilumbu ya bawu. Ba mangaka yawu. Ba mangaka na kutambula na nkonga ya bantu ya kukwikama na Nzambi ve. Ba mangaka bima ya yinza. Ba zolaka sala yawu, na kuvwanda na Ndinga ya Nzambi. Ba zolaka sala yawu.

¹⁷³ Mutindu mosi ya kele bubu yayi. Beno ke kabuka beno mosi na nyonso kasi beno mpe Nzambi. Ya kele ve yina dibuundu ke salaka. Ya kele yina beno ke salaka na Nzambi. Beno me mona? Ya kele beno, mutindu muntu yandi mosi. Yinga.

¹⁷⁴ Kasi beno tala yina Nzambi kupesaka yandi. Ntangu Yesu Yandi mosi kukwizaka, Zacharie kufwaka, Élisabeth, mpe. Kasi ntangu mwana ya bawu ya bakala kukotaka na mfinda, na MUTINDU ME TUBA MFUMU, Yesu tubaka, “Ya vwandaka ntete ve na muntu ya nene yina butamaka na kento mutindu yandi kele.” Amen. Yinki? Yandi talaka mpasi ya nsoni ya busita ya bukento. Yandi kangamaka na Ndinga, mpe yandi butaka mwana yango ya bakala.

¹⁷⁵ Mutindu Sara ya kiboba, mutindu Abraham ya kiboba, bankwelani ya biboba yayi kukangamaka ngwi na Yawu. Beno tala, baya mingi yina kubutukaka, “mutindu zyelo ya mubu,” ya kele ve na bantu na yinza yina kele mingi mutindu ba-Juif. “Mutindu zyelo ya mubu to bambwetete ya zulu.” Yinki kusalamaka? Ya kusalamaka na lutangu ya fyoti, mwana mosi.

¹⁷⁶ Ntangu yayi beno ke na kumona kisika mu ke na kukwenda. Mwana mosi, ya kele nyonso yina ya lungaka. Ya lungaka mwana mosi samu na kuningisa bayinsi mpe kulakisa Mesiya. Ya lungaka mosi, ya kulemvuka. Ya kele kieleka. Nzambi ke kaka na nsatu ya muntu mosi. Ya kele kaka yina Yandi kele na nsatu, kisika Yandi lenda kuzwa ndinga. Kaka yina Yandi zola, kuzwa muntu mosi na yisi ya lutumu ya Yandi. Oh, mutindu Yandi zola kuzwa muntu mosi!

¹⁷⁷ Yandi kuzwaka Noé mosi, kilumbu mosi. Yandi kuzwaka—kuzwaka Moïse mosi, kilumbu mosi. Yandi kuzwaka Jérémie mosi—mosi. Yandi kuzwaka Élie mosi—mosi. Yandi kuzwaka Élisée mosi. Yandi kuzwaka Jean mosi. Yandi—Yandi

kuzwaka . . . Yandi kuzwaka Samson mosi. Ntangu nyonso yina Yandi lenda kuzwa muntu mosi na yisi ya lutumu ya Yandi, yina kele Ndinga ya Yandi. Yandi lenda zonza na nzila ya yandi. Yandi lenda fundisa yinza. Oh, la la!

¹⁷⁸ Mutindu Yandi ke na nsatu, ya kuzwa muntu na na yisi ya lutumu ya Yandi, “Yina Mu lenda zonza na nzila ya yandi. Mu lenda bika Ndinga ya Munu kuzabana. Kasi yandi ke telama na ntwala ya nsoni, kasi Mu ke sala Ndinga ya Munu kuzabana.” Beno me mona? Oh, yinga.

¹⁷⁹ Busita, ntete. Fwana vwanda kisita, fwana kutelama na ntwala ya busita. Sarah zolaka telama na ntwala ya yawu. Mutindu mosi zolaka sala Zacharie mpe Élisabeth na kutelama na ntwala ya yawu.

¹⁸⁰ Beno tala, bubu yayi. Ntangu yayi mu ke tuba kima mosi. Beto tala bubu na bana ya kento ya kindumba. Yandi me baka bayinsi na yisi ya lutwadusu ya politiki ya dénomination, kento ya kindumba mpe bana ya yandi ya bakento. Beno tala wapi nsungi ya ba-dénomination yina me telama, mpe mutindu ndambu kele ya kusungama. Beno tala mpasi ve. Beno vwanda na Ndinga. Ya kele nyonso ya kulunga.

¹⁸¹ Ba lenda seka beno, kubokila beno exalté. Ba lenda bokila beno nyonso, mutindu nyonso ya nkumbu ya yimbi. Kasi, beno vwanda kaka kuna, Yawu kele Ndinga, nsoni ya Ndinga, kima yina ba ke tuba na beno.

¹⁸² Ntwenya mosi ya bakala, yandi lenda vwanda awa na suka yayi. Yandi kele nkundi ya munu; Jim Poole, Jim ya ntwenya, dibuta ya yandi—ya yandi. Ba yufulaka yandi kilumbu yankaka yina. Mbote, yandi kuzwaka mbotika awa. Muntu tubaka na yandi, tubaka, “Kana nge zolaka kuzwa mbotika na dibuundu mosi, samu na yinki nge kuzwaka ve dibuundu ya nene, kima mosi?” Beno me mona? Kasi yandi monaka Nsemo. Ya vwandaka yina. Beno me mona?

¹⁸³ “Bana ya ya kukondwa kudedama kele mingi kulutila na baya ya kudedama.” Yinga. Mbote mingi. Mutindu ba kele ndambu, baya ya kudedama! Beno tala mutindu ndambu ya diboko ba vwandaka na kilumbu ya Noé. Beno me mona? Beno tala yinki ya vwandaka na bilumbu ya Sodome. Beno me mona? Mutindu ndambu kele baya ya kudedama!

¹⁸⁴ Bana yikwa kento ya kindumba kele na yawu! Yandi ke butaka bana kidi-kidi, kasi bawu nyonso kele bana ya makangu. Kento ya kindumba ke butaka kento ya kindumba. Yimbwa ke butaka yimbwa.

¹⁸⁵ Mpe Klisto ke butaka ya kukusa. Biblia ke butaka ya kudedama, na yawu beto fwana tula na yintu ti beto kele nkonga ya fyoti. Wapi kima ya lemvo ya kele!

¹⁸⁶ Beno tala dibuundu ya nene ya Éphèse, ya vwandaka kaka na kumi zole na kati kuna. Yinga. Beno tala wapi mutindu ya nkonga ke na beto bubu yayi, na lweka ya bawu. Yinga.

Ya vwandaka kaka na mioyo nana na bilumbu Noé.

¹⁸⁷ Ya vwandaka kaka na tanu na bilumbu ya Lot, ve, yiya; Lot mpe kento ya yandi, bana ya yandi zole ya bakento. Mpe yandi kitukaka dikunzi ya ditadi na manima yandi me basika, na kutalaka na manima. Na kieleka, tatu basikaka na kilumbu yango.

¹⁸⁸ Mpe Yesu tubaka, “Mutindu ya vwandaka na bilumbu ya bawu.” Ya me tala beto na kutala mbote mpe kusala keba. Mutindu ndambu kele ya kudedama! Kasi, mutindu ntangu nyonso, baseki fwana losa nsoni. Busi- . . . Kutelama na ntwala ya nsoni ya busita, ntete. Oh!

¹⁸⁹ Mu fwana sala kaka nswalu. Mu kele . . . Mu ve . . . Beto zola kusadisa samu na bana yayi. Beno vingila munu mwa fyoti. Beno me mona?

¹⁹⁰ Bantu kele ntangu nyonso mutindu mosi kaka. Ntangu yayi mu ke tuba dyaka kima mosi. Mpe mu zola beno . . . Mpe mu zaba ve, kana ba ke na kubakaka na bande to ve. Kasi kana ya kele na bande, mu zola beno kuwa munu, beno bayina ke kuwa bande. Beno kondwa yawu ve, kasi beno longuka yawu. Muntu ntangu yayi kele mutindu yandi kele ntangu nyonso. Yandi ke pesa Nzambi lukumu na yina Yandi me salaka; ke na kuvingila na yina Yandi ke sala; mpe ke kipe ve yina Yandi me sala mpe ke na kusalaka. Yandi ke pesa Nzambi lukumu na yina Yandi me sala; yandi ke vingila na yina Yandi ke sala; kasi yandi ke kipe ve yina Nzambi ke na kusalaka, mpe kuna yandi ke na kukondwaka muvimba ya kima. Mu banza ti ba ke bakula yawu. Beno me mona? Ke kipe ve yina Yandi ke na kusalaka! Yandi zaba yina Yandi me salaka; mpe yandi zaba nsilulu yina Yandi ke sala; kasi yandi ke kondwa na kumona yina Yandi ke na kusalaka.

¹⁹¹ Oh, beno bantu ya Pantekote, kana beno kele ve bifwanukusu ya yina! Beno ke na kuvingila na kima kusalama: mutindu ntangu nyonso, me salama kaka na ntwala ya beno, mpe beno zaba yawu ve. “Bambala yikwa Yandi me zola kuvukisa beno, mutindu nsusu ke salaka bana ya yandi, kasi beno me zola ve.” Beno ke banza mingi na binkulu mpe ba-dénomination ya beno kulutula beno kusala na Ndinga ya Yandi mpe Mpeve ya Yandi. Yinga.

¹⁹² Wapi nsoni samu na Marie! (Na yina beto ke na kumanisa.) Wapi nsoni samu na Marie mpe Joseph, samu na Ndinga ya Yandi! Ya kele ntangu ya Nowele. Mu vwanda zola kubumba kaka mwa fyoti, kasi beno ke kuwaka mingi ya yawu na ladyo mpe na kati-kati ya ba-pasteur, mpe nyonso yina. Wapi nsoni samu na Marie mpe Joseph, na kukangama na Ndinga ya Nzambi ya nsilulu! Beno banza na yawu, ntangu yayi. Mpe kuyina,

na mbunzu ya kukangama yina, na ntangu ba vwanda mona ntwenya ya Marie kuluta, na kumonaka Joseph. “Nge ke kwela kento ya kindumba.” Beno me mona? Mpe beno bambuka moyo, mpangi, ti kinsuza vwandaka lufwa na bilumbu yango. “Ntangu yayi, nge ke na kubumbaka yandi samu na kufwa ve. Yandi ke vwanda mama na nzila ya nge.” Mpe, kasi, beno bambuka moyo, ntangu nyonso, Nzambi vwandaka sala na bawu, mpe ya vwandaka landila Ndinga. Mpe ba zabaka yawu ve. Beno me mona?

¹⁹³ “Mwense mosi ke buta mwana.” Joseph zabaka yawu. Marie zabaka yawu, samu ti, na manima Ndinga kusonamaka, ya vwandaka na Wanzio yina vwandaka zonza na bawu, vwandaka pesa kimbangi, to vwandaka talisa Ndinga ya kieleka yina vwandaka ya kusonama, ti ya zolaka salama. Beno lota ve ntangu yayi. Beno yindula. Mpeve-Santu kulumukaka na ntoto; ata mbala mosi ve zonzaka na dibuundu ya muvimba. Yandi zonzaka na bawu.

¹⁹⁴ Joseph me tala. Mpe ntete Wanzio kutala yandi, yandi tubaka, “Mbote, ntangu yayi, mu zola yandi. Kasi, mu kele muntu ya kusungama. Mu lenda kwela ve kento ya mutindu yina.”

¹⁹⁵ Mpe Wanzio ya Mfumu kumonikaka na yandi, na ndosi, mpe tubaka, “Joseph, nge mwana ya David, kuvwanda na boma ve na kubaka na nge Marie kento ya nge, samu ti yina kele na kivumu ya yandi kele ya Mpeve-Santu.” Oh, la la! Wapi mutindu kuzwa ngolo! Beno me mona?

¹⁹⁶ Mpe, Marie, na nzila ya yandi na dibulu ya maza. Ntwenya ya mwense, pene ya bamvula kumi na sambwadi, kumi na nana, vwandaka kwela bakala yina vwandaka ya kukwela ntete mpe vwandaka na bana yiya; bakala ya kukula. Mpe yandi vwandaka . . . Yandi zolaka bakala, mpe—mpe yandi vwandaka zaba ve samu na yinki. Mpe bakala vwanda zola yandi, mpe bakala vwanda zaba ve samu na yinki. Mpe awa ba vwandaka. Na kukwizaka, na kukwenda na dibulu ya maza, samu na kuzwa mwa maza, mpe yandi—yandi vwandaka yindula na bima nyonso yina yandi tangaka, na Masonuku, kukondwa ntembe, mpe kuna Nsemo me ke pela mutidu mwini na ntwala ya yandi. Ntangu Nsemo yina me prla mutindu mwini, kuna me telama Wanzio mosi.

¹⁹⁷ Mu ke kumiyufula wapi mutindu ntwenya ya Marie kutalaka na nzutu? Beno me banzaka ntete na yawu? Mu ke kumiyufula kana yandi vwandaka na boma mutindu munu mazono.

¹⁹⁸ “Mbote, Marie!” Mbote zola kutuba “telama.” “Kuwa mbote yina mu ke tuba na nge. Nge kele ya kusakumuna na kati-kati ya bakento, samu ti nge me kuzwa lemvo na ntwala ya Nzambi, mpe nge ke kuzwa Mwana. Kukondwa kuza ba bakala, kasi nge ke kuzwa Mwana. Mpe Elisabeth cousine ya nge, na buboba, mpe,

yandi me kuzwa kivumu mpe, mpe yandi ke buta mwana. Mpe bidimbu yayi ke salama.”

Yandi tubaka, “Wapi mutindu yayi ke salama, na kuzabaka, na kumonaka ti mu zaba bakala ve?”

¹⁹⁹ Yandi tubaka, “Mpeve-Santu ke fika nge. Kima ya Santu yina ke butama na nge ke bokilama Mwana ya Nzambi.”

²⁰⁰ Bika bantu ke sekaka Nzambi kutuba yina bawu zola. Yandi zabaka yawu. Yandi zabaka ti yawu ke vwanda, samu ti Nzambi tubaka yawu.

²⁰¹ Ntangu yayi, wapi mutindu yandi zolaka vwanda, kilumbu ya lusakumunu yina, to kilumbu yina ba kwizaka samu na kuzenga Bébé bubakala, na yina kuna yandi vwandaka belama na mwa Bébé yayi na maboko ya yandi, mutindu *yayi*. Mpe bakento nyonso vwandaka bika nzila, bawu nyonso na dentelle ya mbote, samu na kusakumuna bana ya bawu mpe kuzenga bawu bubakala, mpe na kutala bawu nyonso vwandaka benda mwana-dimeme. Kasi yandi vwandaka na bapizio zole, nkusununu samu na mvedolo ya yandi mosi. Mwa Bébé ya kufika na langeti, yina ba salaka na kizitu yina ba vwanda tulaka na laka ya ngombe, kizitu, nkebolo yina ba ke salaka na mukongo ya ngombe. Ya vwandaka kaka langeti ya mpamba na kati ya kidikulu. Ba vwandaka na kima ve samu na Yandi. Ba vwandaka mputu mingi. Mpe awa yandi me telama.

²⁰² Kukondwa ntembe ti, bakento nyonso vwandaka vwanda ya bawu ntama na ntwenya ya mwense. Ba vwandaka tuba, “Beno me mona, yandi kele na mwana ya makangu.” Beno me mona mutindu Nzambi ke salaka bima kotalana ya kulutila. Oh, la la! Yandi ke sala kaka mutindu ti Satana kumona kaka tiya. “Wapi mutindu yimbi! Wapi mutindu Mvindu! Kinsuza. Ya kele yina yandi kele. Yandi kele kento ya kinsuza.” Yina sukisaka ve yina vwandaka bula na kati ya ntima ya ntwenya Marie. Ba vwandaka vwanda ya bawu ntama na Yandi.

²⁰³ Ba ke na kusala dyaka kima mutindu mosi, ke bokila Yandi ntangu yayi, “Exalté, to fanatike,” to kima mosi.

Marie zabaka Mwana vwandaka ya Nani. Yandi landilaka kaka, kaka mutindu mosi.

²⁰⁴ Kasi, oh, ba zolaka tala ve ntangu, Siméon, yina vwandaka ya kuvwanda na manima ya kivinga, ti ba silaka yandi? Yandi vwandaka tambula bisika nyonso, na kupesaka profesi. Yandi tubaka, “Mfumu me monika na munu.” Mpe yandi vwandaka tuba, “Mu ke mona ve lufwa...” Mpe yandi vwandaka na bamvula makumi nana na kima kuna. “Mu ke mona ve lufwa ntete mu mona mpulusu ya Yandi.”

²⁰⁵ “Oh, Siméon, nge kele kiboba, bakala. Ya nge—ya nge... Kiboba ya mawa na kutala me zimbisa mabanza ya yandi, beno

zaba, yandi kele mwa . . . Beno bika kaka yandi swi. Yandi ke pesa boma ve. Yandi ke sala muntu mpasi ve.”

²⁰⁶ Kasi Siméon vwandaka na Ndinga ya Mfumu, yandi vwandaka tuba, “Mu me mona Mpeve ya Nzambi kukulumuka na zulu ya munu. Mu me telama mpe me tala Yandi. Yandi me tuba na munu, ‘Siméon, nge me vwanda muntu ya kusungama. Mpe nge ke . . . Mu ke sala ti nge kuvwanda kimbangi kuna.’” Uhuh. Kaka yina.

“Samu na yinki Nge ke sala yawu, Mfumu?”

“Yina kele dyambu ya Munu.”

²⁰⁷ Dibanza ya munu kele, ti Yandi lenda kieleka kusemba bawu, na Kilumbu yango. “Beno vwandaka na mbangi. Samu na yinki beno kuwaka ve yandi?”

²⁰⁸ Ya kele na kiboba ya kufwa meso Anne, yina vwandaka ya kuvwanda na kati ya tempelo, vwandaka sambila. Mfumu kumonana na yandi, “Siméon me vuna ve.” Amen. Yandi vwandaka zaba ve kufwanikisa nsemo ya kilumbu na ya mpimpa, kasi yandi vwandaka lenda na kumona ntama kulutula bantu mingi bubu yina kele na meso ya mbote. Yandi monaka, na Kimpeve, ti nkwezulu ya Mesiya vwandaka me kuma pene-pene, Mpeve vwandaka sala na kati ya ntima ya yandi.

²⁰⁹ Beno me mona wapi Dibundu ya mwa fyoti ya vwandaka? Zacharie, Élisabeth, Marie, Jean, Anne, mpe Siméon; sambanu na kati ya ba-milio. Mutindu na bilumbu ya Noé. Sambanu ya bawu. Nzambi salaka na mosi na mosi ya bawu. Ba vwandaka bawu nyonso na ngwisani. Bawu nyonso kuvukanaka. Amen.

²¹⁰ Beno tala, kiboba Siméon. Awa ke na kwiza mwa Mwana. Yandi me kuwaka ntete ve kima na zulu ya yawu. Awa kele Bébé. Mpe kuna Siméon ya kuvwanda na kati ya kivinga ya yandi, mpe Mpeve me kwiza na zulu ya yandi, me tuba, “Basika, Siméon.”

²¹¹ Awa yandi me kwenda, ke na kutambulaka, na kuzabaka ve kisika yina yandi ke na kukwenda. Mutindu Abraham, yandi vwandaka sosa kima mosi. Yandi zabaka ve kisika ya vwandaka, kasi yandi landilaka na kukwenda. Na manima ya mwa ntangu fyoti, yandi kutelamaka. Mpe Mpeve-Santu zolaka tuba na yandi, “Yandi yayi.”

²¹² Yandi me telemisa maboko, na maboko ya Marie, me baka Mwana na maboko ya yandi. Yandi me tala na zulu mpe me tuba, “Mfumu, bika kisadi ya Nge ntangu yayi kubika luzingu yayi na ngemba. Meso ya munu ke na kutalaka mpulusu ya Nge.” Kima yina bantu nyonso vwandaka seka, yina bakento vwandaka kima, Siméon tubaka, “Ya kele mpulusu ya Nge, Mfumu.”

²¹³ Mpe pene ya ntangu yina, awa me kwiza kiboba mosi ya kento ya kufwa meso, yina vwandaka sosa nzila ya yandi, vwandaka luta bantu na mpasi. Mpe yandi me kwisa pene-

pene na Yandi, mpe yandi mpe pesaka profesi, samu ti yandi vwandaka sosa Yandi. Yandi tubaka na Marie, “Mpele ke tobula ntima ya nge, kasi Yawu ke talisa mabanza ya bantima mingi.” Beno me mona? Yinki ya vwandaka?

²¹⁴ Ntangu yayi, mu banza ti, bayankaka ya bawu bakento vwandaka tuba, “Ntangu yayi beno ke mona yawu! Beno me mona wapi mutindu ya dikanda ya kele? Beno bawu yayi. Beno me mona? Kaka yina. Beno me mona kisika ya kele? Kiboba ya bakala yina, ya kukota na yintu. Beno tala yandi na lweka kuna, ya kutelama na ntuala ya kento ya kento ya kindumba, ke na kumeka na kutuba kima mutindu yina. Beno bawu yayi. Mwana ya makangu yina. Beno tala kiboba Anne, yandi ke vwanda ntangu nyonso awa, ke bika yandi mosi kufwa nsatu, mpe ke landila mutindu yina. Yandi ke kuzwa ata kyese ve mutindu beto ke kuzwaka. Kasi, beno bawu yayi, beno me mona. Yandi zolaka vwanda na bimvuka nyonso ya yinsi awa. Yandi me basika na dibuta ya mbote, beno me mona, mpe yandi zolaka vwanda kuna. Kasi yandi yayi. Beno me mona mutindu nkonga yango ke vukanaka?” Oh, yinga. Amen.

²¹⁵ Kima mosi bubu yayi. “Kele ya kuvwanda na bisika ya Mazulu na kati ya Klisto Yesu, me zanguka na nzila ya Mpeve-Santu.” Kieleka. Yinga, tata.

²¹⁶ Oh, beto kele dyaka kaka na mwa ntangu? Mu fwana tuba kima. [Dibuundu me tuba, “Yinga.”—Mu.]

²¹⁷ Mu ke na muntu yankaka awa, yina mu ke na kutala, na kilumbu yina ntangu Ndinga kutalisamaka, bantu ya ndwenga.

²¹⁸ Kana mu lendaka kuzwa ntangu, Fred, samu na nge na kutanga yawu. Nge ke na yawu na posi ya nge? [Mpangi Fred Sothmann me tuba, “Inga.”—Mu.] Mu banza ti mingi ya beno kumonaka yawu na magazine.

²¹⁹ Kima yina Mpeve-Santu tubaka awa na nzadi, bamvula makumi tatu na tatu me luta, ba me vutukila kaka yawu. Kilumbu ya 9 ya ngonda ya zole, ke na kulakisa yawu, na nzila ya astronomie, mutindu ti—ti Jupiter mpe bambwetete, salaka kuvukana ya bawu!

²²⁰ Ba kele na mana- . . . ya astronomie ya ntama ya matadi yina ba me sonikaka, ba me timuna. Ya kele kaka na ntangu yina ti kuvukana yayi kusalamaka, na kati ya kuvukana ya bambwetete yayi, mpe yawu me kutalana nyonso na Babylone, mpe bantu ya ndwenga kulandaka yawu. Beno me bambuka? Ba-orbite ya bawu kuvukanaka, kukwendaka dyaka ntama, na kukabukaka bakyazi ya bamvula ya nsemo. Mpe bantu ya ndwenga yango ya ba-Juif yina vwandaka na Babylone, ba kumonaka kuvukana ya bambwetete yango kukwiza na kati ya kuvukana ya bambwetete yina, bambwetete yina. Tatu ya bawu kwizaka, kintwadi, mpe salaka mbwetete mosi yango ya suka. Mpe bawu zabaka yawu na nzila ya Ndinga ya Nzambi, ti yina vwandaka ntangu, ntangu

bambwetete yina kuvukanaka, ti Mesiya zolaka vwanda na zulu ya ntoto.

²²¹ Ya kele samu na yina ba bandaka, “Wapi kisika Yandi kele, Ntinu ya ba-Juif yina me butama? Wapi kisika Yandi kele? Kisika mosi! Samu, ntangu bambwetete yango ke vukana, tii banzutu ya bawu ya mazulu ke kuma na kati ya nzutu mosi yayi ya nene awa, ntangu bawu tatu yayi ke vukana, Mesiya ke vwanda na zulu ya ntoto na ntangu yango.” Mpe na yina ba kotaka na ba-orbite ya bawu, bantu yayi zabaka ti Mesiya vwandaka na zulu ya ntoto.

²²² Ba vwandaka bamfumu ya bilanga ya bawu. Ba vwandaka bantu ya nene. Ba vwandaka bamfumu ya bilanga ya bawu ya luzabu ya yinza ya lukwikilu. Ba vwandaka tala mbote na lweka ya lukwikilu ya yawu. Mpe ba monaka kutambula ya bambwetete yango kuna, Jupiter mpe Sargas, mpe kuna kukota na mulonga ya bawu—ya bawu. Mpe ba tubaka, “Beto zaba ti Mesiya kele kisika mosi. Na yawu, Yandi fwana vwanda na Jérusalem, samu ti ya kele kisika ya kimfumu ya nsambulu ya yinza, ya nsambulu ya Mesiya. Ya kele kisika ya bawu ya kimfumu. Yina kele kisika ya kimfumu ya ba-dénomination. Ya kele kisika nkonga ya nene ya mabuundu ke vwandaka.”

²²³ Mpe na zulu ya basamo ba kwendaka, bamvula zole, ba sabukaka Nzadi ya Tigre, mpe na kulutaka na bisika ya maza-maza mpe bafinda, na kuzyetaka, na kukwendaka na mbanza, bantima ya kufulukana na kyese.

²²⁴ Ba zabaka ntangu bambwetete yango vwandaka ya kutelama kuna. Mpe yayi, mpe bantu ya astronomie ke tubaka, bubu yayi, “Kana bawu bubu yayi, bambwetete yayi, kuvukana dyaka na kisika yina, ya ke sala mbwetete mosi, katuka kisika ba vwandaka ya kutelama, vwandaka tala.” Kasi ba zolaka vwanda ya kutelama na kisika yina, samu na kumona yawu. Amen. Amen.

²²⁵ Ya me tala kisika beno kele ya kutelama. Ya me tala na yina beno ke na kotalaka. Uh-huh. Yinga.

²²⁶ Na yawu ba monaka yawu, mpe ba landaka yawu, mpe ba vwandaka kaka na mulonga. Ata kisika ba vwandaka, ya vwandaka kaka na mulonga na bawu. Ya vwandaka twadisa bawu. Beno me mona?

²²⁷ Ya kele mutindu beno fwana kuzwa Masonuku nyonso kutandama, nyonso, na manima beno vwanda na mulonga yina na Masonuku. Nzila kele kaka yina. Ya ke twadisa beno mbala mosi na Yandi. Ya kele kieleka.

²²⁸ Ntangu yayi beno tala. Awa ba ke na kwiza, ke na kuboka, “Wapi kisika Yandi kele, Ntinu ya ba-Juif yina me butama?” Na kati ya Jérusalem, Mbwetete twadisaka kaka bawu kuna, mbala mosi kaka na kisika ya kimfumu ya ba-dénomination. Kasi ntangu ba balukaka lweka yankaka ya yawu, Mbwetete

bikaka bawu. Na kati ya mbanza ba vwandaka kwenda, kumata mpe kukulumuka babala-bala. Ba vwandaka banza ti mbanza ke vwanda ya kifuluka na kyese ya Nzambi. Kumata mpe kukulumuka babala-bala, na kyese, ba vwandaka kwenda, na kubokaka, “Wapi kisika Yandi kele yina me butuka Ntinu ya ba-Juif? Beto me mona Mbwetete ya Yandi ntangu beto vwandaka na Esete, mpe beto me kwiza na kufukimina Yandi.”

²²⁹ Beno bambuka moyo, Mbwetete, bawu vwandaka kwenda na wesete. Bawu vwandaka na Esete. “Na wesete beto ke na kuziyeta, ntangu nyonso ke na kwenda na ntwala. Twadisa beto na...” Beno me mona? Ba vwandaka kieleka... Ba vwandaka... Mbote, Babylonie mpe Inde kele na Esete ya Palestine, fyoti na lweka ya sude esete. Mpe bawu vwandaka kwenda na wesete. “Na wesete beto ke na kuziyeta,” beno zaba nkunga yina, “ntangu nyonso beto ke na kukwenda na ntwala. Twadisa beto na Nsemo yango ya kulunga.” Beno me mona? Bawu, bantu ya ndwenga, vwandaka kwiza wesete. Bikaka Esete, vwandaka kwenda wesete, mpe ba monaka Mbwetete yango. Ntangu yayi, kana ba vwandaka na Wesete, ti ba talaka na manima, ba zolaka mona Yawu ve. Beno me mona?

²³⁰ Bawu, natngu ba kumaka kuna, Yawu kutwadisaka bawu kaka kuna, na manima Yawu kubikaka bawu. Mpe bawu banzaka, “Ya kele awa. Mbwetete kwendaka, awa kaka.” Ba kele na kati ya mbanza. Na yawu, “Oh, la la,” ba tubaka, “bantu nyonso ke na kuyimbaka kaka mpe kele na kyese. Nkembo ya Nzambi me pesa nsemo na nyonso. Na yawu, beto bawu yayi. Beto zaba ti ya beto—ya beto yina beto me sala, mutindu beto me tala mbote kuvukana ya bambwetete yina, ata muntu, ata mfumu, zolaka mata kuna mpe kuvukisa bambwetete yayi. Mpe beto zaba, ntangu—ntangu bambwetete yango ke vukana na nzutu yango ya mazulu, ya kele ntangu Mesiya kele na zulu ya ntoto. Mesiya kele na zulu ya ntoto.”

²³¹ Mpe konso bankama mingi ya bamvula, ba ke lutaka dyaka na kuvukana ya bvambwetete ya bawu, beno me mona, mpe na manima dikabu ke kwiza na ntoto. Beno tala.

²³² “Mesiya kele na zulu ya ntoto, ntangu—ntangu nkonga yina ya bambwetete ke vukana.” Mpe ba zabaka ti Yandi vwandaka kuna, na yawu ba kwendaka na kisika ya kimfumu ya nsambulu, mpe bandaka kukwenda, vwandaka tuba, kumata mpe kukulumuka babala-bala ba vwandaka kwenda, na basamo ya bawu, “Wapi kisika Yandi kele? Wapi kisika Yandi kele? Wapi kisika Yandi kele yina me butama Ntinu ya ba-Juif? Beto me mona Mbwetete ya Yandi na Esete. Yandi kele awa kisika mosi. Wapi kisika Yandi kele? Wapi kisika Yandi kele? Wapi kisika Yandi kele?” Huh! Wapi nsoni!

²³³ Ba kwendaka na mfumu nganga-Nzambi. Yandi tubaka, zolaka tuba, “Wapi dyambu na beno bantu? Oh, beno nkonga ya

bafanatike!” Beno me mona? Wapi nsoni, na zulu ya nsalulu ya bawu ya science! Na nzila ya ngolo ya Nzambi, ba kumonaka Mbwetete ya Yandi. Mpe ba vwandaka bantu ya ndwenga, ya mayele. Ba vwandaka na kati ya bilanga ya nsambulu ya science. Mpe bawu kuzabaka, ntangu bambwetete yayi kukumaka kuna, ti Mesiya vwandaka kisika mosi. Mpe awa, kisika yina zolaka zaba yawu, kuzabaka kima ve na zulu ya Yawu.

²³⁴ Mu lendaka kumitala, bana kutelama na bala-bala, kutuba, “Ha! Beno tala munu yayi. Ha! Ya kele nkonga ya bafanatike. Beno kuwa bawu, kutuba, ‘Wapi kisika Yandi kele, Ntinu ya ba-Juif yina me butama?’ Ba zaba ve ti Hérode kele ntinu kuna. Ba zaba ve Bishop *Kingandi*.” Oh, la la!

²³⁵ “Wapi kisika Yandi kele yina me butuka Ntinu ya ba-Juif? Beto me mona Mbwetete ya Yandi na Esete.”

²³⁶ Ba tubaka, “Beno kwiza awa, beno nyonso bantu ya ndwenga awa, ya kizunga awa.” Uh-huh. “Beno kwiza awa. Beno nyonso me mona Mbwetete mosi kisika mosi?”

“Oh, mu me monaka ntete ve kima mutindu Yawu.”

²³⁷ “Beno nyonso bantu ya astronomie beno kwiza awa. Beno nyonso me mona Mbwetete mosi kisika mosi?”

“Ve. Ve.”

“Beno me mona kima mutindu kidimbu ya mansweki?”

“Ve. Beto me mona ve kima ya mutindu yina. Ve.”

²³⁸ Dyaka ve, ntangu yayi. Kima mutindu mosi. Ba ke monaka kima ve. Ba lenda ve kumona Yawu.

“Uh, bika beto bokila balongi. Yinki samu na beno nyonso?”

“Ve. Beto me mona ata fyoti ve Mbwetete.”

²³⁹ “Mbote, wapi mutindu samu na beno bayina ke tesaka ntangu, awa na kibaka? Beno ke talaka bambwetete. Beno zaba konso. . . Beno zaba kisika konso kuvukana ya bambwetete ya kele na mazulu. Beno zaba konso mbwetete. Beno me mona kima mosi?”

“Ve. Beto monaka kima mosi ve.” Kasi Yawu kuvwandaka kuna.

²⁴⁰ Nkembo na Nzambi! Oh, la la! Beno lenda ve kumona Yawu? Ya kele kuna ntangu yayi, kasi ba lenda ve kumona Yawu. Ya ke na kulandila, kaka pene-pene ya bawu, kasi ba lenda ve kumona Yawu.

²⁴¹ “Ve. Beto monaka kima mosi ve. Oh, mu kwendaka kuna. Mu monaka kima mosi ve.” Kieleka, beno lenda ve. Beno kele kaka ya kufwa meso mingi. Ya kele ya beno ve na kumona Yawu. Beno me mona? Kana beno kele ya kufwa meso mutindu yina, oh, kieleka, beno ke mona Yawu ve.

242 Ya kele kaka na bayina Nzambi ke talisa Yawu. Ya kele yina ke mona Yawu. Ntangu nyonso ya ke vwandaka mutindu yina. Kieleka.

243 Ya vwandaka Noé yina lendaka kumona mvula na mazulu, beno zaba, kasi bayankaka ya bawu lendaka ve. Beno me mona? Ba vwandaka mona ve mvula na zulu kuna, kasi Noé kumonaka yawu.

244 Ya vwandaka Abraham yina monaka Sarah ya kusimba mwana. Ya kele kieleka. Ve bantu ke sekaka Nzambi yina vwandaka tuba, “Tata ya bayinsi, bana yikwa me kuma na nge ntangu yayi?”

245 Mutindu beto lendaka tala Biblia ya muvimba, bantu ya ndwenga mpe bapofete, nzila nyonso! “Lukwikilu kele kimbangi ya bima yina ke kumonanaka ve.” Ba zaba ti Ndinga ke zonza yawu, mpe kuna ya kele. *Awa* kele kimbangi ya yawu. Ba ke mona yawu. Ntangu yayi beno tala. Oh, la la!

“Bantu ya beto ya ndwenga ke na kumona Mbwetete yango ve. Ya kele na kima mosi ve na Yawu.”

246 Samu na yinki? Kieleka, na yina ba vwandaka tala, mpe ti ba kotaka na kati ya nkonga mosi, Mbwetete kuzimbanaka.

247 Kima mutindu mosi bubu yayi. Ya kele yina me salaka Nsemo mingi kufwa, ya kele kieleka, ke kangama na nkonga mosi mutindu yina, yina ke kwikilaka kwandi ve na Yawu, na kubanda. Mpe wapi mutindu beto ke kuzwa kuvukana ya mabuundu? “Wapi mutindu beto ke tambula kintwadi kukondwa ti beto kuvwanda ya kuwisana?” Wapi mutindu kuzinga na kimpangi ya . . . ya yayi awa, ya yinza ya muvimba, ya mabuundu nyonso, kuvukana ya mabuundu ya yinza? Wapi mutindu beto ke kuvukana kintwadi, na yina beto kele ya kukabuka mafuku ya ba-mille? Beno me mona? Wapi mutindu beto ke sala yawu? Bantu ya Nsangu ya mbote na beto, mpe *bayayi*, mpe *bayina*, mpe *bayina*, mpe beto nyonso kintwadi, mpe dyaka kuvukana kintwadi na mutindu ya nkonga ya kubeba.

248 Nzambi ke na kuzwa Kento yina kele ya kuvedila, ya santu, ya kinsuza ve, yina ke vwanda na Ndinga ya Yandi. Mbote mingi.

249 Nsoni ya Yesu samu na Ndinga. (Mpe kuna beto ke sukisa, na minuti kaka.) Yesu kuzwaka nsoni samu na Ndinga. Beno tala awa. Wapi mutindu Yandi zolaka telama na ntwala ya nsoni, na yina Yandi vwandaka Kinzambi, Nzambi na nzutu? Yandi vwandaka Nzambi, Yandi mosi, yina kumaka nzutu.

250 Ntangu yayi, beno zaba ti Biblia ke tuba yawu. “Beto simbaka Yandi. Bawanzio kumonaka Yandi.” Beno banza kaka na yawu. Mu banza ti Timothée tubaka yawu kima mutindu yina. Beno me mona? Ti, “Kukondwa kumanga dinsweki ya kinzambi kele nene; samu ti Nzambi kutalanaka na nzutu, ya kumona na Bawanzio.”

²⁵¹ Bawanzio vwandaka na lubutuku ya Yandi. Mutindu Bawanzio zolaka tala na yisi mpe kuyangalala, ntangu ba talaka na yisi na kidikulu ya bibulu mpe monaka Nzambi na kati ya nzutu. Amen. Ya kele samu na yina kukondwa ntembe ti ba bandaka na kuboka, “Bubu yayi, na mbanza ya David, me butuka Klisto Mvulusi.” Bawanzio kuyangalalaka, mpe ba bulaka mapapu ya bawu ya nene kintwadi, mpe kuna na myongo ya Judée, ba vwandaka yimba, “Nkembo na Nzambi na mazulu, ngemba na ntoto, mpe luzolo ya mbote na bantu.” Ba kumonaka Ndinga ya Nzambi, ti ba vwandaka tala Yawu mbote, samu na kumona Yawu kutalana. Mpe kuna Yawu vwandaka.

²⁵² Ntangu yayi, Satana kwikilaka yawu ve, beno zaba. Yandi tubaka, “Kana Nge kele. . .”

Wanzio me tuba, “Yandi kele.” Beno tala luswaswanu.

“Kana Nge kele, sala *yayi-mpe-yayi*. Ti beto kumona Nge kusala yawu.”

Kasi Wanzio me tuba, “Yandi kele kuna.”

²⁵³ Bantu ya ndwenga na balukwikilu ya bawu ya luzabu ya yinza, tubaka, “Yandi kele kuna.” Amen.

²⁵⁴ Ya kele samu na yina bantu ya archéologie mpe nyonso bubu yayi ke na kutimuna bima yayi, yina ba pesaka baprosesi bamvula fyoti me luta, ti ya ke salama. Mpe awa bawu yayi, ke na kutimuna. Bawu ata mbala mosi ve kwandi. . .

²⁵⁵ Ya kele na ata disolo yina ke tuba ti Ponce Pilate kuvwandaka na ntoto. Beno zaba yawu? Ti ndambu ya beno bana ya lukolo kutuba na munu wapi kisika ba me tuba na disolo ti ya vwandaka na Ponce Pilate. Mpe bantu ya kukwikama ve ke vweza yawu mpe ke seka yawu, ba ke tuba, “Ya me vwandaka ntete ve na mfumu ya Rome na nkumbu, na guvernère ya nkumbu, Ponce Pilate.” Kasi pene ya basbala sambanu me luta, ba me timuna ditadi ya nsongi: Ponce Pilate, guvernère. Oh, la la! Tala buzoba!

²⁵⁶ Ba tubaka, “Ya me vwandaka ntete ve na Ramsès na disolo, Ramsès na Égypte.” Kasi ba me timuna ditadi, archéologie: Ramsès, ya zole. Beno tala.

²⁵⁷ Mpe ba tubaka ti bibaka yina kubwaka ata mbala mosi ve. Bantu ya archéologie vwanda timuna na kizunga, mpe, kima ya ntete beno zaba, ba timunaka, kwendaka na yisi na kisika bibaka kubwaka na Jéricho, beno zaba, ntangu mpungi kuwakanaka. Ba tubaka, “Ya vwandaka kaka disolo, nkunga yina muntu tubaka, kuyimbamaka na bilumbu kuna.” Yinga. Bantu ke sekaka Nzambi ke tuba yawu. “Ya vwandaka kaka disolo. Kuna me vwandaka ntete ve na kima mutindu bibaka kubwaka, mpe ti Josué kubulaka mpungi, mpe kubelamaka na bibaka mpe ti yawu kubwaka. Ya me vwandaka ntete ve na kima mutindu.” Mpe mosi ya Muklisto ya nene ya muntu

ya archéologie kulandilaka kaka na kutimuna, samu ti yandi zabaka ti ya zolaka vwanda kieleka. Yandi timunaka bametele kumi, na yisi kisika bayankaka ya bawu kuvwandaka. Ya vwandaka na bibaka, ya kutula na zulu ya mosi na yankaka, kaka mutindu Ndinga tubaka.

²⁵⁸ Ba tubaka, “Ya vwandaka ve na kima mutindu ti David kubulaka na kisalulu, gitari ya nsinga, samu ti muziki ya nsinga vwandaka ya kuzabana ve tii na quinzième siecle.” Ba tubaka, “Ya me vwandaka ntete ve na kima mutindu yina.” Miklisto ya bantu ya archéologie kutimunaka, na yisi ya Égypte. Bamvula mafunda yiya me luta, ba vwandaka na bisalulu ya nsinga. Amen. Oh, la la!

²⁵⁹ Ba tubaka, na yina me tala bana ya ba-Hébreu yina vwandaka sala matadi ya bawu mpe bima mutindu yina, na nzila ya matiti, “Ya vwandaka ve na kima mutindu.” Bantu ya archéologie kwendaka kuna na kutimuna. Yinki ba kuzwaka? Ya kele luzabu ya yinza. Yinki ba kuzwaka? Bibaka ya mbanza yina ba-Hébreu kutungaka, matadi ya kitezo ya ntete vwandaka ya kufuluka na matiti; ya zole vwandaka ya kuzenga na mwa bitini ya fyoti ya ba-chaume; mpe ya tatu vwandaka ve na matiti na kati ya yawu, ata fyoti ve. Oh, la la!

Bayinsi ke na kukabwana, Israël ke na
kuvumbuka,
Bidimbu yina baprofete kutubilaka.

²⁶⁰ Yinga, tata. Yawu nyonso me kwiza mbala mosi na beto, mpangi ya bakala, mpangi ya kento. Samu na yinki yawu? Na mwa bamvula me luta, yinza ya sinema me sala yina me salamaka ntete ve. Na bizizi me talana disolo ya *Misiku Kumi* ya Cecil DeMille. Na bizizi me talana luzingu ya Yesu Klisto na nzila ya *Ben Hur*. Na bizizi me talana *Mulobi-mbisi Ya Nene*, kuvutuka na lukwikilu ya Pierre. Mpe bisambu nyonso yayi ya lukwikilu, yina sinema kumangaka, mpe kukumisaka mvindu, mpe kulosaka. Kasi, Nzambi, na ngolo ya Yandi ya nene, me samuna yawu, kaka mutindu mosi.

²⁶¹ Ntangu kaka yayi, bima yango yina kutubamaka bamvula fyoti me luta, munu mosi, ya mawa, mwa kisadi ya kulemvuka, ya Nzambi, Mu tubaka, “Ya kele na Nsemo yina ke telamaka mpe ke zonzaka na munu, mpe ke tubaka na munu bima ya kusala.” Bantu sekaka mpe tubaka, “Yandi me zimbisa fyoti mabanza.” Beno tala foto ya Yawu. Science kubaka Yawu. Ya kele kuna. Ya kele Kieleka.

Mu tubaka, “Kento yayi kele ya kufika na kinsinsya ya lufwa.”

²⁶² Ba tubaka, “Kivudi, awa, yayi buzoba. Yandi ke salaka kaka yawu na yintu ya yandi.”

²⁶³ Yawu yayi foto ya yawu. Nzambi ke sala matadi kuboka. Yandi lenda sala yina Yandi zola.

264 Yesu, nsoni samu na Ndinga. Mwana ya Kinzambi ya Nzambi vwanaka ya kutelama kuna, Emmanuel, wapi nsoni! Yandi kubikaka ti misumuki bantu ntembe kukanga Yandi, kulosa mate na kizizi ya Yandi, mpe kukatula na ngolo ndambu ya diboko ya mandefo, mpe zolaka ti Yandi kusala kima mosi samu na yawu. Nsoni samu na Ndinga! Uh-huh. Yinki? Samu na kulungisa Ndinga ya Tata. Oh! Kasi, beno bambuka moyo, Yandi zolaka telama na ntwala ya nsoni ya lufwa. Nzambi, Yandi yina lenda ve kufwa, mpe Yandi yina kaka lenda kufwa samu na kuvulusa musumuki. Muntu yankaka ve, muntu ya zole ve to muntu ya tatu ve, zolaka sala yawu. Nzambi Yandi mosi kele Yina lenda sala yawu. Mpe awa Yandi vwanaka.

265 Yandi tubaka, “Ya kele ve na muntu yina mataka na zulu kasi Yandi yina kulumukaka na yisi, Mwana ya muntu yina ntangu yayi kele na Mazulu.” Amen.

266 Ba tubaka, “Batata ya beto kudiaka mani na ntoto ya kuyuma.”

“Mpe ba kele ya kufwa,” Yandi tubaka.

“Mpe Nge ke tuba ti Nge kele Dimpa ya Luzingu?”

267 Yandi tubaka, “Ntete Abraham kuvwanda, MU KELE. Mu kele Dimpa ya Luzingu. Mu kele MU KELE.”

268 Ba tubaka, “Nge ke na bamvula makumi tanu ve, mpe nge ke tuba ti Nge ‘monaka Abraham?’”

269 Yandi tubaka, “Ntete Abraham kuvwanda, MU KELE.” Mpe na manima me bika misumuki kukanga Yandi, dibuundu ya badénomination, kukanga Yandi.

270 Beno me bambuka moyo, na kilumbu ya nsuka, dibuundu ya bivwama yayi ya Laodicée, ba me tula Yandi mpe, na ngaanda, ya dibuundu. Beno me mona kisika ya kele ntangu yayi? Beno lenda mona samu na yinki mu ke bokaka na kuteleminaka système yango?

271 Samu na yinki Yesu kubikaka ti misumuki kukanga Yandi? Ya vwanaka samu na kulungisa Ndinga, samu na kunata nsoni na Nzambi, kufwa. Nzambi kufwaka. Yandi zolaka vwanda nzutu, samu na kufwa. Mpe Yesu kuzabaka yawu. Yandi tubaka na bawu na yina me tala yawu. Yandi tubaka, “Beno bebisa tempelo yayi, mpe Mu ke vumbula yawu dyaka.” Muntu yankaka ve kuvumbulaka yawu. “Mu ke vumbula yawu. Na bilumbu tatu, Mu ke vutula yawu dyaka kaka. Beno bebisa yawu; Mu ke vumbula yawu. Mutindu Jonas kuvwandaka na kivumu ya baleine, bilumbu mpe bampimpa tatu, mutindu mosi Mwana ya muntu ke vwanda na kati ya ntima ya ntoto.” Mpe bawu kubakulaka kwandi yawu ve. Beno me mona? Nsoni samu na Ndinga, Yandi—Yandi vwanaka.

272 Ntangu yayi, kuseka tii na lufwa, samu na kuvumbuka dyaka samu na Luzingu ya Kukonda nsuka. Yandi zolaka vwanda ya

kutula na lufwa, samu ti Yandi kulenda na kuvumbula samu na Luzingu ya Kukonda nsuka, mpe samu na kunata konso muntu ya moyo yankaka (yina vwandaka na kati ya nzutu ya Yandi) na Luzingu ya Kukonda nsuka, bayina ke ndima Yawu. Beno me mona? Yandi kumaka muntu, mpangi Mukudi, mpe zolaka telama na ntwala ya nsoni ya kuseka nyonso, mpe kuseka nyonso, kaka mutindu bampangi ya Yandi ya kisalu kusalaka ntete Yandi. Mutindu Moïse, mutindu Noé, mutindu bayankaka nyonso ya bawu yina telamaka na ntwala ya kuseka yango, Yandi zolaka telama na ntwala ya kuseka. Samu na yinki? Yandi vwandaka na Ndinga, mpe Yandi vwandaka Ndinga. Ya kele samu na yina ba sekaka Yandi mingi kulutila ntangu nyonso. Yandi vwandaka Nzambi mpe Yawu mosi Ndinga. Alleluia! Ya kele yina vwandaka sala Yandi.

273 Yesu tubaka, “Beno bantu ya luvunu.” Yandi tubaka, “Beno ke tunga bandyamu ya baprofete, kasi beno kele bayina ke tulaka bawu na kati kuna. Bawu ke kwiza na Ndinga ya Nzambi, mpe beno ke kwikila bawu ve. Beno kele ya kuzaba dyambu na mosi na mosi ya bawu.”

274 Na Phoenix, kana Nzambi kuzola, mu simbaka mpova mosi kilumbu yankaka yina, mu ke funda nsungi yayi na kufwaka Yesu Klisto, na kukomaka Yandi dyaka, Mu ke nata kufunda na ntwala ya kimvuka ya milongi, kana Nzambi zola. Ba kele ya kuzaba dyambu na Menga ya Yesu Klisto, na kukomaka Yandi dyaka. Yinga, tata. Kufunda bawu nyonso!

275 Pierre kufundaka bawu, na Kilumbu ya Pantekote. Yandi tubaka, “Beno na maboko ya yimbi me koma Mfumumu ya Luzingu, Yina Nzambi me vumbula. Beto kele bambangi.” Yandi nataka kufunda.

276 Mu ke baka Ndinga ya Nzambi, ke funda konso dénomination yina kele, mpe muntu nyonso na zulu ya ntoto, yina kele ya kuzaba dyambu na Menga ya Yesu Klisto. Ti Nzambi kusadisa munu na kuvwanda nzonzi ya Yandi na kilumbu yango. Amen. Yinga.

277 Oh, bantu ke sekaka Nzambi kusekaka Yandi. Ba salaka Yandi nsoni. Yandi vwandaka kaka na Yawu. Amen. Oh! Beno tala mbote yina Yandi kusalaka. Yandi vwandaka Mwana ya Nzambi, yina talaka mpasi ya lufwa samu na kufwa disumu. Yandi zolaka sala yawu. Ya kele kaka mutindu ya zolaka vwanda na kutula yawu na lufwa. Mpe Yandi salaka yayi, mpe telamaka na ntwala ya yawu, samu ti bawu nyonso yankaka kusalaka yawu.

278 Samu ti, kuna bawu nyonso na ntangu yina kuzwaka Ndinga ya Nzambi na ndambu. Samu ti, Yesu kutubaka mutindu yina. “Ndinga ya Mfumumu kukwizaka na baprofete. Mpe wapi yina ya bawu,” Yandi tubaka, “ti batata ya beno, nsambulu ya beno ya organisation, ba losaka ve matadi mpe tulaka na lufwa? Nani

na kati ya bawu kuyambaka baprofete? Na manima beno ke tunga bandyamu ya bawu na manima ya kufwa ya bawu.” Yandi tubaka, “Beno zaba dyambu na kutulaka bawu na kati kuna.”

²⁷⁹ Na manima Yandi me pesa bawu kingana ya vinu ya kufuta, mpe bisadi yina kwizaka. Ba nyokolaka bawu, na manima na nsuka ba tubaka, “Awa beto ke kufwa mwana, samu ti yandi kele kibiyadi.” Beno me mona? Oh, ba kumaka ya kudasuka ntangu ba monaka yawu. Beno me mona?

²⁸⁰ Kasi Yandi zolaka telama na ntwala ya nsoni. Mpe awa Yandi mosi me bika ba kanga Yandi, kunata na lufwa, samu na kuvwanda ya kutula na lufwa, samu na kuvutula Luzingu ya Kukonda nsuka. Nkembo na Nzambi! Oh, mutindu mu zola Yandi! Samu na kuvutula Luzingu ya Kukonda nsuka mpe kuvumbula konso mwana ya Nzambi, nzila nyonso ya bansungi, yina telamaka na ntwala na Ndinga yango mpe yina kuzwaka nsoni. Ya kele kieleka.

²⁸¹ Kana Yandi kwizaka ve, Noé zolaka vumbuka ve. Kana Yandi kwizaka ve, Élie zolaka vutuka ve. Kana Yandi kwizaka ve, Noé zolaka vumbuka ata fyoti ve, Kana Yandi zolaka ve . . . kana Yandi kwizaka ve. Samu ti, Yandi vwandaka Mwana - dimeme yina kuvwandaka na lukanu ya ntete ya Nzambi, yina kwizaka kuzwa nsoni Yandi mosi, mpe kufwaka na lufwa samu na Ndinga nyonso ya Nzambi yina kuzonzamaka, mpe samu na yina bantu ya kusungama yayi kutelamaka na ntwala. Yandi zolaka vwanda yawu. Muntu yankaka ve zolaka sala yawu. Nzambi Yandi mosi, mpe Yandi kwizaka mpe bakaka kisika, ti Yandi lenda vuukisa mpe kupesa Luzingu ya Kukonsa nsuka na konso mwana ya Nzambi yina kutelamaka na ntwala samu na Ndinga mosi mpe na yina zolaka tala nsoni. Konso mwana ya Nzambi, nzila nyonso ya bansungi, yina zolaka telama na ntwala ya nsoni, ya vwandaka ve na muntu yina zolaka vuukisa yandi, kasi na nzila ya lukwikilu yandi kumonaka Mukudi yango kukwiza.

²⁸² Job kumonaka Yandi. Kuna Job kutelamaka na ntwala na kilumbu yina, mpe ba tubaka, “Oh, nge kele musumuki ya kubumbama. Nzambi ke na kunyokolaka kaka nge, samu ti nge kele musumuki ya kubumbama.”

²⁸³ Yandi tubaka, “Mu zaba ti Mukudi ya munu kele moyo. Na bilumbu ya nsuka Yandi ke telama na zulu ya ntoto. Ata ti misyete ya nzutu ke bebisa nzutu yayi, dyaka, na nzutu mu ke mona Nzambi.”

²⁸⁴ Kento ya yandi tubaka, “Samu na yinki nge ke singa ve Yandi mpe kufwa?” Yandi tubaka, “Nge kele mutindu muntu ya kubela ya kusuka.”

²⁸⁵ Yandi tubaka, “Nge ke na kuzonza mutindu kento ya kilawu.” Amen. Kuna Yandi vwandaka. “Mu zaba ti Yandi kele moyo, mpe ti Yandi ke telama na Kilumbu ya nsuka.”

286 Kana Yesu kwizaka ve, Job zolaka vwanda ya kuvuuka ve, samu ti Yandi vwandaka Mwana-dimeme yina kufwaka kubanda mbandukulu ya yinza. Yandi zabaka kisika ya Yandi. Yandi zabaka Yandi me telama.

287 Ya kele samu na yina, Marie kuzabaka ntelamanu yango, kilumbu yango ntangu yandi basikaka kuna. Yandi tubaka. . . “Kana mu. . . Nge vwandaka awa, mpangi ya munu ya bakala zolaka kufwa ve.”

Yandi tubaka, “Mpangi ya nge ya bakala ke vumbuka.”

Yandi tubaka, “Yinga, Mfumu, na mvumbukulu. Yandi vwandaka mwana ya bakala ya mbote.”

Yesu tubaka, “Kasi MU KELE mvumbukulu yango. Nge me kwikila yawu?”

288 Yandi tubaka, “Yinga, Mfumu, mu ke kwikila ti Nge kele Mwana ya Nzambi yina zolaka kwiza na kati ya yinza.”

Yandi tubaka, “Wapi kisika beno me zika yandi?” Oh! Beno bawu yayi. Um-hum.

289 Yandi zabaka yawu. Mwa mwana ya kento yina vwandaka tala yawu ya kutuba kaka ve. Yandi vwandaka na bampeve ya yimbi sambwadi yina ba basisaka. Yandi zabaka ngolo ya Nzambi, yina lendaka na kukatula ngolo mpe kukwamisa mpe nyonso, ntama na yandi, yina lendaka kukatula yandi mwa yango, mpeve ya munimi ya école secondaire, mpe lendaka kusala yandi kivangu ya malu-malu. Yandi basisaka sambwadi ya bampeve ya yimbi. Bakento yayi kuzabaka nani Yandi vwandaka, bayina ndimaka Yandi.

290 Bawu zabaka yina Yandi zolaka sala samu na bawu. Mutindu mosi bawu ke salaka mpe, bubu yayi. Kundima kaka yawu. Yina kele kima yina ke landa.

291 Yandi yayi. Yandi me tuba yawu. Mpe Yandi. . . Beno zaba yinki kusalamaka. Oh!

292 Bawu nyonso yina zolaka tala mpasi samu na Ndinga mosi, Yandi kufwaka samu na dyambu yina. Yandi vwandaka Yina kaka zola kufwa, samu na kusala yawu, samu ti Yandi vwandaka Ndinga. Yandi vwandaka Ndinga, Ndinga yina me monisama pwelele. Bayankaka nyonso kuzwaka mwa kukota ya maza, kasi awa vwandaka kufulukuka ya Nzambi, na kati ya Yandi. Mutindu mosi Yandi kele bubu yayi. Hébreux 13:8, “Yesu Klisto kele mutindu mosi mazono, bubu yayi, mpe kukondwa nsuka.” Beno kuwa.

293 Kieleka, mu ke na kumanisaka. Mu ke sala yawu, mu fwana kaka. Mu me lutisa ntangu.

294 Yandi sonikaka ve Ndinga mosi. Yandi salaka yawu? [Dibuundu me tuba, “Ve.”—Mu.] Yandi sonikaka ata mbala mosi ve Ndinga. Samu na yinki? Yandi vwandaka Ndinga. Yandi

vwandaka yinki? Bandinga yina ba sonikaka, Yandi vwandaka kumonisama pwelele ya Ndinga yango. Nkembo! Fiou! Ntangu yayi mu ke na kumitala mbote. Yandi vwandaka Ndinga. Yandi zolaka sonika kima mosi ve. Yandi vwandaka Ndinga, Ndinga ya kusonama yina me monisama pwelele. Nkembo na Nzambi! Yandi kele mutindu mosi bubu yayi, mazono, bubu yayi mpe kukondwa nsuka. Yandi kele Ndinga, Ndinga yina me monisama pwelele.

Beno ke tuba, “Ya kele kieleka, Mpangi Branham?”

²⁹⁵ Beno tala mbote Yehovah kutelama na manima kuna mpe kufula samu na kuyumisa nzila na kati-kati ya maza kuna, mpe kusala nzila samu na Israël na kusabuka.

²⁹⁶ Beno tala mbote Yehovah na nzutu, kutuba, “Swi, vwanda swi.” Ntangu mimpo vwandaka bula basimu, na kitembo, mpe ti dyabulu vwandaka ningisa nyonso, mutindu yina, Yandi tubaka, “Swi, vwanda swi.” Mpe yawu kutumamaka na Yandi; mipepe mpe nyonso. Yandi vwandaka Yehowa. Amen.

²⁹⁷ Yehovah yina zolaka telama kuna mpe kutsyamuna matonzi ya kinoko, kubika yawu kubwa na ntoto mpe kukuma dimpa, samu na kudisa bantu.

²⁹⁸ Yandi kutelamaka mpe kubakaka bambisi tanu, to, mampa tanu mpe bambisi zole, mpe kudisaka mafunda tanu.

²⁹⁹ Yandi vwandaka Ndinga. Amen. Amen. Yandi kele Ndinga, mpe Yandi ke vwanda Ndinga ntangu nyonso. Mpe samu na munu mpe yinzo ya munu, beto ke sadila Ndinga.

Oh, mu zola mona Yandi, mu zola tala kizizi ya
Yandi,
Kuna kuyimba ntangu nyonso lemvo ya Yandi
ya mpulusu;
Na babala-bala ya Nkembo, bika mu zangula
ndinga ya munu;
Ntangu minianga nyonso ke luta, na yinzo, mu
ke yangalala.

³⁰⁰ Oh, la la! Yinga. Beno nata nsoni ya Ndinga. Ya kele na nsoni yina ke kwenda na Ndinga. Beno vwanda kaka na Ndinga, mpe beno nata nsoni.

Beto sambila.

³⁰¹ Yesu, mutindu nkokila yankaka yina, Mfumu, mu bokaka, “O Yesu, yinki Nge zola munu kusala? Yinki mu lenda sala, Mfumu? Na kumonaka bima yayi, mpe na kuzabaka ngunga yina beto ke na kuzinga, yinki mu lenda sala, Mfumu? Yinki mu lenda sala?”

³⁰² Mu ke sambila samu na dibuundu ya munu ya fyoti awa, Mfumu. Mu ke banza na mwa bandeke yina na vision, bima yina kusalamaka; mpe bandeke yankaka yina, yina vwandaka bima ya nene. Kasi ya vwandaka na mabaya tatu ya yawu, Mfumu.

Kasi ntangu Bawanzio yayi kukwizaka, ya vwandaka dyaka ve na bandeke yina bikanaka. Mwa bazabisi yayi vwandaka mbote, Mfumu, kasi mu ke kwikila ti kima ke na kukubamaka na kusalama. Ti ya vwanda mutindu yina, Mfumu. Yidika beto mpe sala beto na manima ya nzila ya Nge. Beto kele—beto kele ntoto. Nge kele Muwumbi banzungu.

³⁰³ Na kilumbu yayi na ntuala ya Nowele, Mfumu, beto me vutula matondo samu na dikabu ya Nzambi, yina Nzambi me pesa beto. Ata ti yayi kuvwanda mosi, na yina beto ke kwikila na bantima ya beto, lukwikilu mosi ya luvunu ya mumpani ya kilumbu yina ba me meka na kuyidika mpe kusala na kuvwanda mutindu messe, messe ya Klisto, kasi beto ke na kukwiza ve na mutindu yina ya Tata ya Nowele mpe bayinti ya Nowele mpe—mpe bakubongisa. Kasi beto ke na kwiza na Nkumbu ya Mfumu Yesu, samu na kusambila Nzambi ya Mazulu, yina kumaka nzutu, nzutu mutindu beto, mpe zingaka na kati-kati ya beto, samu na kuvuukisa beto; mpe talaka mpasi ya nsoni ya Nkumbu, talaka mpasi ya nsoni ya kulunsi, samu na kubika misiku ya yinza kufwa Emmanuel, samu ti Yandi kunata beto na Luzingu ya Kukonda nsuka.

³⁰⁴ Nani beto kele, Mfumu? Nani beto kele, samu na kukima nsoni? Nzambi, kumisa beto basoda ya ngolo. Mu me pesa mambu yayi na Nge, Tata. Ya lendaka vwanda ya kuzengana; mu kele ya kulemba mpe kulemba ya kulutila mingi. Kasi, Tata, futa bantu yayi na kuvwandaka mpe kuwa. Mpe ti ngolo yina vumbulaka Mfumu ya beto, mpe monikisaka Yandi na beto awa mutindu Mvulusi, na bilumbu yayi ya nsuka, ti ya sala konso mpeve na kati awa, Mfumu, kutala mbote ti Nkwizulu ya Mfumu Yesu me kuma pene-pene. Ti ya vwanda mutindu yina, Tata.

³⁰⁵ Belusa bantu ya kubela mpe bampasi yina kele na kati-kati ya beto. Kanga bantima ya kulwala. Mfumu, beto kele. . . Beto me lutila na nzila ya mingi, ntima ya munu kele na bidimbu mingi na zulu ya yawu, Mfumu, katuka bamvita ya nene. Mu kele munwani ya ntama. Sadisa munu, Mfumu. Mu ke na nsatu ya lusalusu ya Nge. Mu banza ti kulongoka nyonso yayi kuvwandaka samu na lukanu mosi. Mu ke na kivuvu ti ya me vwanda, Mfumu. Sadisa munu, O Nzambi. Mpe sadisa dibuundu yayi. Mpe sakumuna beto, kintwadi.

³⁰⁶ Sakumuna bana ya fyoti. Mu ke na kubanzila na mingi bubu yayi, mwa, mwa bana yina ke kuzwa ve kima na ngaanda kuna. Mpe mu—mu ke sambila ti Nge ke vwanda na bawu mpe ke sadisa bawu. Pesa bawu Luzingu ya Kukonda nsuka, Mfumu. Yina kele ya nene. . . ya kele Dikabu ya Nowele yina beto zola, ya kele Luzingu ya Yesu Klisto samu na kutwadisa mpe kuyala na kati ya ntima ya beto. Ya kele yina mu zola, Mfumu.

³⁰⁷ Sakumuna beto, kintwadi ntangu yayi. Beto me pesa Bandinga yayi na Nge. Ti ya kubwa kisika nyonso ya ke kubwa,

Mfumu. Kisika nyonso yina bantima ke vwanda mwasi, ti ba nata ntangu mosi ya nkembo ya mpulusu, na Nkumbu ya Yesu. Amen.

³⁰⁸ Bayina nyonso. . . Bantu yikwa zola Yandi? Samu na yinki kuvwanda na mbangu, na mutindu nyonso? Oh, mu zola Yandi! Mu zola Yandi. “Mfumu, yinki Nge zola munu kusala?”

³⁰⁹ Beno zimbana ve balukutakanu ya nkokila yayi. Beno zaba ntangu yayi yina zola kutuba Nowele? Oh, *Yayi* kele dikabu ya munu ya Nowele. *Yayi* kele Ndinga yango. Mfumu, kana mu lenda kaka kubika munu mosi, kana mu lenda kaka kumipesa na ngaanda ya nzila samu ti Ndinga ya Nge kulenda kubasisa Yawu, Yawu mosi kubasika *awa*, ya kele—ya kele kima ya kulutila nene yina mu zaba.

³¹⁰ Ntangu yayi mu banza ti ba kele na mwa bima yina ba zola kupesa bana. Ntangu yayi mu ke vutula kisalu na Mpangi Neville. Nzambi kusakumuna beno.

Mpangi Neville.



NSONI SAMU NA DYAMBU YA NDINGA KNG62-1223

(The Reproach For The Cause Of The Word)

Nsangu yayi ya Mpangi William Marrion Branham, kulongamaka na Kingelesi, Na Lumingu na suka, ya 23 ya Ngonda ya kumi na zole, na mvula 1962, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org